

樊榭山房全集

冊三

PL
2718
.I14
v.3





樊榭山房集卷第八

新舊陳氏

錢唐厲

鶚

太鴻

詩辛

施竹田移居

以下
丁巳

後洋街畔城西隅客來愛君屋上烏清涼居士跨
驢處君今寫入移居圖妻孥絕類楊通老板輿況
有白髮扶人生鄉里聊自足勝彼蓬轉無根株東
風吹換幾甲第玉川破屋天壤俱石香詠室是新
署有待花藥流芬敷青山一桁出埤垵數步卽瞰
錢唐湖開年殘臘景相接大篇小句如聯珠祭竈
請鄰亦不惡載鱸迎富誠何須迎富事見春宵得
酒更招我牆腰淡月吟模糊

二月一日汎舟西溪

孤游避妍晴入艇極淒冷滿空春雲生冥冥垂半
嶺花村下微霰歷亂不復整夤緣出溪口始見一
峯影犬吠暮烟中似宿武陵境懷我同心人燈青
曙耿耿

入河渚泊古梅花下

春水何緩緩入浦拏音徐隔林度山雪陰雲晦潭
虛搖颺不逢人幾曲心悄如著船梅花根厓冷苔
痕餘脩篁映寒色紛然月生初粼粼影欲流曠望
通前渠忘言寄物外獨往仍相於日夕風更起髣
髴攬我裾

新霽自安樂山至秦亭山道中作

肩輿雖勞人幽尋息吾趾還如履白雲橫度青嶂
裏一里一裘回林鳥哢遲晷稍稍數家村蠶桑課

春事塵網幸見疎吾土兼信美野風香落梅深竹
照流水昨來忽晴陰浮生正如此猶持入山心
還向城市

同授衣話吳興舊游

昔年曾記共清歡水國樓臺入夏寒好事故人分
茗供高情太守借山看過橋樹色濃於畫掠艇溪
光染未乾安得與君常泊宅更無塵土汙毫端

同作

錢唐

陳章授衣

春風陳迹已漫漫爲話蘋香憶碧瀾四月桑陰
門巷綠半城溪色市橋寒老漁舉網銀刀出少
婦繰絲雪繭殘果有心期不相負三閒水閣未
應難

四月十一日客廣陵秋玉佩今招予同爲

京口之游晚雨泊舟入高旻寺

龍宮晚沈沈天人衛庭戶清冷七葉林幾點摩羅
雨門前爲通津方袍自安處孤塔倒池深定禽隱
花聚采真具扁舟信步皆淨土睥容睇如空心叩
寂寞取

曉霽出江口望五州山

夷猶方舟發曉色江上微初識五州山向來知是
非洩雲獨未斂淪波若無依連林翳更吐秀岑覲
復違徐聞風荻偃氛淨浮陽暉淹留惜去權賞此
忘朝飢褰裳願旣謬尋烟跡亦希偕我漁釣侶眷
言翦荷衣

重游焦山信宿石壁菴二首

神山眇何許欲往不可求焦公棲隱處溯沿成後

游衆木生夏寒絕壁銜僧樓綠陰下無地江影如
雕鏤移來天外帆森晶胡豆洲一窗納萬里波遠
斜陽收禁足花幢古攝衣篠塢幽他時風雨至或
見飛龍秋

成連去我久清興竊如昨來逢海月明遂踐攜琴
約淙淙水鳴絃心手兩無著餘音入風林坐使衣
裳薄夜分江斐悲古調久不作行將徧名山遠夢
接衡霍

登甘露寺多景樓

紺殿壓山脊細路蟠雲根重摩衛公塔歲月何崩
奔名蹟久飛灰恨石無留痕英雄氣已盡回向寂
滅言江天風色涼晏坐開北軒羈情尙隋苑歸思
過吳門四月南紀綠布縠啼千村遙知舟中望楚

客多傷魂

招隱寺

戴公遺青山松門限畦畛清風入仙梵雲壑流不
泯空香層構出密葉長廊引西窺鹿跑泉林影寫
鏡錦故人李約輩藉草共瓢飲微聆得至音寒漱
有餘凜荒臺傳蕭梁亂石如插筍讀書今已無耳
學予自哂古事滿禪關追尋恐難盡

山上有昭明太子讀書臺

以宗宗重游鶴林寺

淑惠丈清陰竹輿穿野田寺門對峻嶺標致餘千
氣張網米老像香冷馬祖禪空院何所聞啄木聲
琅然頽垣斂古色剝蘚出殘鐫高吟亦云苦後代
誰爲傳老僧修故事補植紅杜鵑可惜無客賞流
豔照山烟竭來跡宛宛久坐風翩翩共證不壞性

且就虛堂眠

題禹尚基畫白桃花

樂府爭傳渡口歌
淡妝奈此折枝何
冶春合就雲爲夢
笑月應憐玉作渦
盧女後時鉛粉薄
劉郎重到鬢絲多
亭亭付與徐黃手
輕著宮衣襯碧羅

曲阿道中偶成寄秋玉佩兮

吟罷江山助發揮
沙鷗相與共忘機
天隨杜野小辛去
帆傍涼風深樹飛
浪跡只今堪寄傲
遠行苦愛不如歸
故人知我宜銷夏
遣製湖邊白葛衣

御覽引吳志岑昏鑿丹徒至雲陽杜野小辛闕皆

斬絕陵襲施力艱辛杜野屬丹徒小辛屬曲阿

幼魯第五女生命名曰卻盜爲賦詩

爲盜不過五女門
鄙諺得之陳仲舉
女能貧家自古然
云何生女哺用脯
近來名女取於斯
錢唐有

客符幼魯大者笄總已選壻小者扶牀或索乳雙
鬟又復弄嘔啞誰言耳耳非佳語偷兒昨夜徒手
歸正坐詩窮由阿父幾年烏帽走京華數升紅粟
分天庾聊將孩稚作解嘲置酒倒箱情太苦江浙
人生
女多者畢嫁作倒箱
會見莊綽雞肋編 佗年牽犬亦足辨蒲覓會見
歸甯拜翁姥我聞女不貴勝人與門之男衰門女
慰情目前雖可喜緩帶心期終不沮爲君試誦蘭
偉房若比徐卿神所予

答沈申培見訪之作

雨入南湖動小波造緇有客肯經過階荒只是蛙
難禁門靜兼無雀可羅沈約舊吟雌霓好陳陶漫
著癖書多人閒回首皆塵土始覺相期在礪阿

雨後南湖晚眺

新漲夜來平釣磯田家橋外涼
湔激湖雲倒破山一角水葉亂
搖風四圍六月披緜氣候變扁
舟弄笛行人歸吳興城南我舊
識小水晶宮知者稀湖南

杭人名白洋池在田家橋側號小水晶宮

葉紹翁四朝聞見錄

夏秋之交臥疾南湖草堂辱竹溪沈六幼牧以佳句三首見寄如數奉答

經旬外戶不輕窺當暑懷冰病亦奇
雨久蟻衣生壁早夜涼螢火入簾遲
毀茶恐被高人笑時以肺寒禁茗
稱藥甯煩妙友爲灑灑心清無睡處
幾回落月有餘思

溪堂十畝竹中居數朵當門峯儼如
十字水分菱葉外三家墅繞豆花初
珠聯羣從皆能詠玉立諸郎盡解書
記得綠陰移櫂去開尊聽雨卽吾廬

夾山碧浪共縈回佳處勞君憶不才安得元真蓑
笠載先須摩詰畫圖開鷗邊信誓明如日菊候風
流欠此杯直待歲寒深雪裏短篷安穩覓詩來

寄調大宗納姬京邸

才子西清近接聯鈿車初駕正華年由來燕玉多
能煖何況張星本在天學拜牀婆先鎖院預修眉
史有如椽故人遠在江湖外未得親逢卻扇筵

八月二十五日病起吳敦復邀同宣城沈
丈樗崖符幼魯施竹田王麀徵趙誠夫汎

湖

八月杭州好天氣病餘來上汎湖船西風爲我健
詩骨鷗鳥狎人如水仙白髮交游幾輩在秋陰酬
倡十年前

辛丑秋日常與樗山幼魯竹田諸君賦湖上秋陰詩忽忽十七年矣

四山

涼翠滴杯底看斂斜陽雉堞邊

題貞松慈竹圖爲歸安陳節母作凡五章

申培之母

竹兮無心榮悴忘只松兮有心飽雪霜只
南榮竹雨北牖松颺有嫠者母聽而淒其
維竹之慈子母鉤帶母也似之訓育罔怠
維松之貞柯葉不改母也似之銜辛卅載
子賢而文母壽而康何以娛之松竹在堂又何侑
之歌吟鏘鏘

侍讀徐壇長先生八十致仕書來索詩賦
寄四首

風華江左流傳別道脈閩南似續餘大好玉堂揮
翰手廬陵文字魯公書

特起孤臣出薜蘿抽簪旋許 主恩多鄉人尙惜

懸車早已是懸車十載過

曲臺集禮聚諸生遠壓高齋學士名頭白成書猶
有待儒林依舊屬遵明

杖履蕭閑楚水旁歸然海內魯靈光自從醞得詩
書味別具天人一種糧

秋日同高西唐游鐵佛寺

寺在揚州北郭
爲五代楊行密

故宅

樹壓平岡碧殿孤我來何處弔楊吳佛從劫火銷
時見秋到遙天盡際無草亂難尋朱瑾墓鴉歸猶
學黑雲都淮流不洗當年恨誰與英雄酹一壺

閏九月客廣陵同金壽門陳授衣閔廉風
江賓谷集吳氏城東水檻

百年難遇此佳辰料理殘秋發興新小戶仍修送
酒事薄游先約試香人鉤簾鶴柴涼移影俯檻魚
牀淨洗塵爲謝紅橋兒女道不將歌舫污青蘋

張約

齋賞心樂事十
月詩禪堂試香

秋玉游洞庭回以橘茶見餉

若士愛遠游逸翮不可攀朝乘一掌風夕至洞庭
山胸吞三萬六千頃大圓鏡裏八九羅烟鬟奇文
祕句滿藤笈山中清味攜俱還餉我洞庭橘赤如
莫釐峯頭日白傳揀貢餘右軍封題畢翦從平蒂
閒折技逆鼻香霏甘齒溢緘藏歸待獻老親不數
湘湖楊梅頂山栗餉我洞庭茶鷹爪顆顆先春芽
虎丘近無種剔目名可嘉功能徹視比龍樹金甌
不怕輕翳遮淪以龔春壺子色最白啜以吳十九

珍微宋版印
殘浮雲花翩翩風腋乘興到左神幽墟列仙之所
家告訴我生困識字素書探得何足誇許我紫泉
白芝鍊毛骨大勝塵土蹙蹙於天涯

題秋玉洞庭詩卷後

自古浮天兩洞庭千年詞客幾揚舲愛君淡著有
聲畫收拾秋光補水經

長至日雪次聖幾韻

荒徑人如埽葉稀歸來畏影掩雙扉故鄉自異他
鄉節三白今看一白飛積處但添梅格古烹時更
助玉池肥歲寒與子成來往大好湖山付落暉

答沈東甫病中見寄

寒臥湖村聽雁聲來詩力疾見君情天公應是憐
清癯饒喫年年一箸羹

小雪初晴訪敬身於城南同游梵天講寺
延攬江山之勝徘徊久之敬身得五字古
體一章予次其韻媿不稱也

平生重心朋造訪起寒早坐對屋外山無醜祇見
好遂果古寺游雪後風力小點素在巖壑插翠出
樹杪露槃雙蹲蹲檀越誰戴纛用梁沙門法雲答周捨語願服
埽塔衣頂禮向雲表故人詩格健饑鷹獨奇矯指
示乾德年備史藉稽考并泥墮軍持野火飛佛爪
歎息殿翼空閑房叩幽窅影壁轟煥儼經函閱微
眇重過歷十霜彌覺竹石老試問護伽藍江月幾
回曉卓哉眉山翁心地久汎埽白氎借餘溫一聽
妙聲鳥

原作

丁敬

朝來幽事動良友過我早清游敦宿昔一雪晴
正好邈迤城之南幾度略約小蹋凍乾蘚坡徙
倚疎林杪礪風劃松雪殘玉落翠熏錢王此締
構突兀雙塔表劫火雖皴黹勾勒猶天矯金容
歸浩空追蠡翳勿考依稀景泰字別辨勞指爪
靈鰻應就蟄寒螿懾深窅裴回日亭午古意益
繇眇高僧句通禪心折玉局老月履疑往來烟
鐘寂昏曉久立肌骨森煩慮脫如埽江光瑩不
搖極目點雲鳥

至後暖雨復雪旬浹不止得詩三首

水泉冬不枯簷雨何浪浪夜半礪礪明誰發天地
房化匠有迴斡風霰凌朝光煦燠不可恃君子履
其常

王氈旣落毛謝屐亦敗齒雪片劇銀箭急響撲窗
紙堆堆山字坐寒燼挑未已欲喚李書生攜卷向
星子

快雪如故人歲寒輒復來皎然照籬落一白無嫌
猜朔吹爲宿留十日相裴回眼中昨暮兒擾擾真
浮埃

雪中聖幾招飲秋聲館用前韻

高閑今似偉明稀遲我衝寒款竹扉笑伴近來雲
易散吟情豪甚雪爭飛力將陶謝追風雅恥共張
何較瘦肥

三輔決錄何氏肥張氏
瘦二族以此知貴賤

玉茗花前一尊

酒病顏先爲發春暉

南湖殘雪追和句曲外史山居雪霽韻

隱居住佳處南湖上雪後年年遠目凝轉巷山光猶

粉粉入樓柳意半銷冰平分幽事晴沙鷺老我心
情故紙蠅絕勝蕭疎范寬筆內家休背鵲紋綾

次韻

錢唐符之恒聖幾

先生闔戶坐十日隔城山雪遠銷凝南湖幾樹
老臨水東郭有人來踏冰靜翫蘧廬散野馬微
吟石鼎笑蒼蠅病懷近愛梅花衲不分香寒半
臂綾

立春後一日集吳敦復餅花齋次竹田韻
淨几單牀月上初主人對客似僧廬春來預作看
花約貧去宜求種樹書隔巷舊游成結托十年豪
氣早銷除依然不墜風流處五畝園開手翦蔬

原作

錢唐施安竹田

一宿東風雪盡初青鞵三五過林廬深宵且對

故人酒淨眼同看
善本書飯顆中年吟
易瘦梅
花老屋歲將除
春來自笑生涯儉
擬伴園官鬪
凍蔬

次韻

仁和 王曾祥 磨徵

眼看時序又春初
枯坐經年此屋廬
客至殷勤留半榻
酒闌珍重說遺書
荒街共聽更三點
殘雪猶分月滿除
好事主人情轉劇
辛盤還約試

嘉蔬

時予下榻齋中

徐丈紫山今年八十三矣
居清波門外湖濱
病足不出戶日事吟詠
寄示近作賦此

仰酬

兩年不見紫山翁
聞道嬰顏尚舊紅
腳疾偶然徐道度
詩名合繼鮑清風

宋鮑當居清波門外有詩編曰清風自號鮑清風

支離一榻惟觀化珍重雙餅但餉空有約嚴城苦
相限柳洲乍可繫低蓬

題敬身所藏崔子忠伏生授經圖

樹底危坐秦博士頭童背僂須眉蒼彼姝侍側兩
鬟妥啓脣似有聲微颺一人炯視面若削高冠褒
衣意則莊刻深頗似見顏色潁川掌故稱智囊據
石作几俛首聽手操不律書幾行登來化我本齊
語豈至難辨如公羊此時未有蔡侯紙非是簡策
應縑緗羸灰既冷孔壁匿聖權獨賴生扶將二十
五篇復繼出微言大義難低昂後儒往往疑作僞
欲與百兩俱淪亡典午清談那辨蒲覓切此地下齒
冷梅豫章操矛入室真鹵莽安得生也相撐搪北
平崔丹古節士布袍草履神揚揚貴人乞畫怒不

與槁死土室甘饑疋龍泓館主得小軸晨夕坐對
齋屋張遺經獨抱溯姚姒樸學正可傳諸郎猶勝
濟南一女子宛轉膝下青衿裳

擬冬堂贈辭

并序

乾隆丁巳夏五予抱嗽上氣之疾歷秋乃瘳家人
以爲有妖沴焉歲除前四日命巫歌樂牲醴送之
周禮所云冬堂贈無方無算者此其遺意歟因擬
爲其辭兼用杜子春後鄭二說以俟采詩者

節嘉平修望祀屑瓊糜香猗靡蘭肴芬椒醑旨青
蜺旌兮旖旎陳絲簧兮衆技送將歸兮水帝子媵
游光兮從宜櫛攘殘陰兮除舊皇穹甚仁兮災不
可又女娛游兮康寔之野桃爲弧兮茅爲馬召靈
氛兮占太人五窮遁藏兮壹氣孔神倚東風兮祝

蒼華區陬兮密清梅枝兮橫斜

鄭筠谷宮贊姑孰書來兼以歛墨八枚見
貺賦此代札

故人校文在江介十年間闊訊平安素書忽照春

坊字漆點全分墨務官舊史發凡憑綴述筠谷嘗預修明

史小詩何意助波瀾風流轉憶今來少欲往青山

道路難

除夕意林送糟藏松江鱸魚戲報以二絕
句

今夕椒盤興不孤一坭添得四腮鱸釣公近有松

江信滿眼烟波陸瑁湖皮襲美詩釣公來信自松江

衡門一任歲華流老矣何知事五樓忽覺頭銜兼

兩地鱸鄉亭長醉鄉侯

正月九日夜同人集飲繡谷亭限燈字下

戊午

招尋芳夜興堪乘四面垣衣一架藤亭角夷猶新月上春心牽率曲闌憑漸生白髮惟耽酒爲祝東風莫惱燈從此樂方須次第好將倡和擬松陵

同吳西林汎舟西溪看梅

緩櫂縱遙目心與春流平邀侶以事解得朋因寡營峯色烟上霽竹風沙外清一夜叢梅發幾處山窗明香中林鳥語引我沿溪行積翠點殘雪陰淡寒自生西崦未云夕東畬方可耕稚子肯迎客花閒啓柴荆

尋泉源入西木塢

西峯偶通人蘿蔦極幽蔚崢嶸潺歷礧泉徙迤殊未

既積陽明亂流春田相經緯遠處落空林數家住
雲氣竹根漱潭隩汲飲有真味將尋阿對居樂飢
豈無謂

曉過福清竹院

探幽勇晨興靜院鐘未歇晴烟暎竹澄殘月轉花
沒地僻養靈姿氛潤蒙玉骨有如列仙儒初日晞
蘚髮深山留古春凡豔想易竭老僧空色相折取
供白佛護此無盡燈常依妙香窟坐聽籬落閒縣
羽囀清越

放舟河渚至蘼葭里

梅花界北渚流水與花俱隨花入水源單汎同輕
鳬白雲何方來亭童過艤舫芳洲始瀰漫倒暎如
敲湖與子濠梁意久脫塵事拘持頤得靜觀短楫

畫菰蒲際岸見山影尙隱殘黃蘆灣洄轉多態中
汴浮覆盂梵放知有人漁歌憶吾徒翻然掠波去
淡淡春烟無

始游木橋是梅花最盛處

地近高氏竹窗

略約舊通舟幽徑緣溪迴青山似遲客一一花上
來迷濛始難辨的皪驚已開髣髴合江路五分春
信催此地感興廢豪貴荒池臺不改蠶漁戶並花
分水隈晴昊少風雨古樹多莓苔願就餘杭姥吟
翫傾深杯

擬游橫山不果回舟有作

市盡松聲孤野曠山勢遠橫山不可到深秀紛挂
眼永懷江居士高眠絕異患靜笑泉出谿冷愛雲
在巘穿翠若飛梭嘉名錫策蹇伊余有同心未愜

結廬願誰云惜早芳惆悵回撓晚

明江元祚邦玉築橫山草堂攜

家隱焉有驢名曰梭翠除夕山居詩云靜隱空山無箇事祇憐溪水一年忙高致可想也

哭沈東甫

曲曲溪雲抱隱居晚年問葉結相於縉塵別後山河隔白社生前笑語疎高允誰爲徵士頌嵇康久作絕交書篋中糾謬存唐史尙有兒孫檢蠹魚

吳興

諸沈問葉不問房出范攄雲溪友議君所著有新舊唐書合鈔若干卷

晚過奔牛堰聞杜宇有懷汪西顙在析津

古堰經由處蜀禽啼暮雲風多聲易失林靜語初分歸客尙爲感居人如不聞萍漂南北路因爾惜離羣

小舫次姚茶山韻

波平風定去猶遲低拂藤枝與柳枝長短橋通新

雨後兩三客坐夕陽時紅窗旋學蘇州樣白版閑
題杜牧詩略載些些脆絃管看君不似釣魚師

南湖中元夜

秋逼空街響暗蜚烟波館外覓行蹤入懷驟覺風
聲薄出海偏驚月氣濃野寺酸文招薜荔水樓隱
語託芙蓉悵悵悄悄年年事涼著疏簾第一重

施北亭攜酒湖上

滿意扁舟拂曉催涼雲遠岫自縈回詩從青箬笠
前得秋在白荷花上來老色漫隨時序改好懷多
爲故人開雞頭菱角香無限除卻江南無此杯

秋日過吳西林郊居有作次韻二首

相對吳居士清風自滿襟迢迢黃卷事寂寂白雲
心瑤瑟一以汎素塵無復侵誰傳寡女怨彌使古

情深

時西林鼓自製
瑟作黃鵠歌

幽意紛無數起行平野閒秋陰在深樹風氣似空
山寺古尋僧去村遙冒雨還君家饒鳥雀能賞此
時閒

原作

仁和

吳穎芳

西林

客意適林野柴扉聚素襟飯遲花飽眼談淺瑟
傳心荒遠秋先得紛埃事不侵飄蕭門外葉餘
興綠蘿深

迎暮咽寒蟬穿松入竹閒訪秋吟過寺拚雨坐
看山深樹羣車接長汀撩網還不離城市遠隨
意水雲閒

同張妙峯探梅西溪留宿永興寺

以下
己未

張侯崇清真名理似禪伯可與溪中游獻歲事幽

適扁舟掠雲林側帽望青壁寒逗花信遲叢篠綴
疎白微香閉空崖陰曠久未釋淒淒烟雪零黯黯
羣峯夕言造獨園古唯有定水碧西風轉澄廓霽
色上鳥翮紛吾懷故人存歿感在昔

昔年同游諸人唯聖幾已

歿惆悵依佛燈孤光照泉石

新晴汎舟河渚過曲水菴

春宇得風霽景氣亭午佳微霄動川影夾岸吹寒
花卉行不覺遠來訪釋子家聞磬尙隔浦登閣如
浮查當境寂爲樂徧知生有涯願於繩坐參幽蹤
寄菱葭長者號流水童子能聚沙他時記此會竹
外青峯斜

法華山下詣太虛上人雲棲別室

閑門向深山山翠莽回互上人龍眠秀蕭然挂巾

屢自言少年時幾爲世網誤辭家二紀餘空有捐
萬慮見客久杜口契我若雅素不隨雲出溪惟學
藤倚樹如聞竹林僧復論巖壑趣後期指庭梅裴
回不能去

回舟經深潭口至秦亭山下作

平生塵累少隔年微意申及茲共沿越謝彼風波
民窮幽閒籐竹值曠迷涯津春潭易爲綠兼之山
氣新青山時近遠乘流凡幾轉不見花閒人惟聞
桑下犬飄颻時氣舒平晶天容淺篙舟入翠微枉
渚何知返

同西林櫻桃花下作

飄零梅雪一堦平又見櫻桃照眼明春色相催無
俚甚酒人散盡可憐生施朱施粉妝難就非霧非

花畫不成只有南朝宮體在與君相約賦閑情

同吳西林城東看花遇大風戲爲長歌

城南看花誰作羣好事競造丁隱君城東看花寂
寥耳相待獨有吳居士新花破萼初滿叢沙河浩
浩揚天風已看野渚動平碧更覺連林搖亂紅提
攜町疇羨驥子

時西林令子象乾同行

出沒葭蘼多漁翁過

橋人似六鷁退沽酒樽傳三雅空風光如此肯虛
擲閉戶先生真可惜澆花擬向卞公墳彈絲亦就
周家柏淵明子皙兩達人天地甯非百年客有足
愛踏三家村有裾不撇七貴門模糊落日望未已
遙山渲出臙脂痕今朝風起花韞扇莫使遲來花
似霰好將健句當青旛日日夜前一相見

玉泉寺題壁

春來古寺聚輜輶魚樂魚驚鏡裏懸去盡游人寒
食雨和花流出鮑家田

寒食前一日同竹田曦亮諸君汎湖

春陰一望黯迢迢山淥湖光自動搖過眼年時百
五日關心節物第三橋香飛花片來杯面寒送東
風入櫳腰油壁車輕歸路遠雨聲留與可憐宵

哭長城王立夫

酒杯曾記共秋堂廿載流年抹電忙敬禮小文誰
可託著明凶問轉難詳園扉夢噩猶回首泉穴愁
多也斷腸何日水花風葉路藝香山下弔王郎

事累速繫得釋
歸六年而卒

三月十八日同麀徵瑤圃右階蘇門游南

屏山

南山三月暮幽暎此林阿僧寂房猶在潭空客再
過洗松看塔小坐石見湖多卦剔孱顏字吾今悟
刹那

昔訪亦諳上人於此已二
十四年上人化去久矣

同作

仁和

孫庭蘭

瑤圃

杖履陪清暇憑高上翠微崖碑隨徑轉樵語出
林稀衆綠接湖水殘陰帶夕暉休嗟春事晚流
翫竟忘歸

湖心寺見柳花作

亭亭酒舫著三潭楊柳飛花水染藍卻訝春衣風
力緊一天晴雪過湖南

同作

仁和

孫廷槐

右階

楊柳千條拂釣磯苦將飄蕩勸春歸水心寺裏
長廊外不見花開只見飛

題汪近人移居圖

買屋古城下聞君喜客尋
圖書初檢校鄰曲共幽
深埽壁除蛛網開窗納樹陰
自憐流轉意對此一
沈吟

五月二十八日渡太湖至吳江作二首

千古繁華地茫茫浸遠空
猶傳澹臺墓不見吳王
宮一鳥墮寒鏡衆山移
釣篷如聞習流戰零落藕
花紅

孤城繞江色深覺此生浮
雲木秀田舍水風清客
舟凭闌還放鴨吹笛更驅
牛許我將家具林塘卜
最幽

大雨泊塘栖稍霽行二十里復雨二更餘
達杭州仍宿關外

嬌雷挾雨來頓失溪光明縛船並溪閣看盡瓊瑰
傾遠山秀羸見近山頽髻呈澹碧那可畫洮沐紛
逢迎山雲斂復吐櫂入青蘆雨林鴉未起時翻疑
宿淮楚

夏夜同茨簷北亭飲章緒弘南軒以布囊
春醉酒錢麤爲韻予得第二字

快風何由決土囊開軒此夕迎微涼南花破暝開
且落北斗挂林低復昂愁裏著書準虞氏酒邊暴
謔如鄱陽坐無拘忌可作達籬外燈青歸路長
北亭分得麤字詩未就戲爲促之

綠陰園館昨經過洪飲分明似卷波賸韻已聞拈
競病清吟定見和羊何遲留十手傳鈔興停待雙
鬟畫壁歌詩將自來多整暇其如廟壘致師多

重過秋聲館追悼聖幾

斜日生衣更一來竹邊門戶訝風開展書誤字曾
親勘撫樹新陰尙近栽已是披帷無處所何因化
鶴再飛回牙絃一絕千行淚山水清音爲寫哀

秋曉過敬身幽居

蕭晨出南郭雲氣拂衣流蘭發空林雨客來江館
秋鄰雞明復晦梁燕去仍留好在青楊巷題詩語
最道

次韻西林和徐申來無酒

我生少食酒所賦有定命眼雖識杯鐺濡脣蓋天
性往愛同醉醒近頗鬪豪橫五斗昔稱賢千鍾古
云聖沈當戒豐侯嗜或敗齊慶此中得失林顰縷
豈易更達人飲無何不諱一日病徐公高士孫

申來

爲徐世臣先生孫先生注
名復社後爲僧名淨徒

酒德頗雅正空抱癭木

瓢乃似僧盃淨種黍思東臯挹漿指西柄長吟君
試和滑稽漫嘲評絕倒禁釀語倚閣招手令乞疑
申西虛呼肯庚癸並君著北山經樂勝奉朝請奚
煩未啐勤但舉先酌敬初筵若參我微酣破幽篴
一壺送汜潛入咽如去鯁

七月二十五日作

頌酒無能合閉關小庭幽事詎全刪樹留晚雨兼
簷滴闌臥秋花亞石斑涼暑未平憐屬疾夢醒同
趣憶看山何時竟得消摩力六尺烏篷自往還

予賃居南湖上八年矣其主將鬻宅氏復
謀棲止瑞石山下有屋數楹東扶導予相
度頗愛其有林壑之趣以價貴未遂也因

用癸卯贈東扶移居韻寄之并邀城南吟社諸君共和焉

性僻愛高棲依山靜聞見懷此已有年五藏待灑
練夙契西谿西花深地頗善近便城北隅風漪展
湖面廡下終借人彈指信流轉素交張長公謀爲
置破硯林扉並南麓江影白成片峯敲翠壑入巖
裂泉自薦消搖隔市聲聊可寄幽眷老大役生理
來去如社燕誰營草堂貲坐使襄陽先洛中見山
錢囊空復何遣胡顏謝嵐霞緘口向親串瑞室頌
有時祗恐年鬢晏

樊榭山房集卷第九

錢唐 厲 鶚 太鴻

詞甲

國香慢

素蘭

路遠三湘記幽崖冷谷采徧瑤房仙人鍊顏如洗
尙帶鉛霜窈嫋東風搖翠返魂處佳珥成行飄零
遇張碩已墮紅塵還舞霓裳 月中何限怨念王
孫草綠孤負空香冰絲初弄清夜應訴悲涼玉斲
相思一點算除是連理唐昌閑堦澹成夢白鳳梳
翎寫影雲窗

齊天樂

吳山望隔江霽雪

瘦筇如喚登臨去江平雪晴風小溼粉樓臺嚴寒
城闕不見春紅吹到微茫越嶠但半泓雲根半銷
沙草爲問鷗邊而今可有晉時櫂 清愁幾番自
遣故人稀笑語相憶多少寂寂寥寥朝朝暮暮吟
得梅花俱惱將花插帽向第一峯頭倚空長嘯忽
展斜陽玉龍天際繞

百字令

丁酉清明

春光老去恨年年心事春能拘管永日空園雙燕
語折盡柳條長短白眼看天青袍似草最覺當歌
嬾恹恹門巷落花早又吹滿 凝想烟月當時錫
簫舊市慣逐嬉春伴一自笑桃人去後幾葉碧雲
深淺亂擲榆錢細垂桐乳尙惹游絲轉望中何處

那堪天遠山遠

西江月

靜極翻如有待眠多未是無
慇懃柳花毬轉碧窗綃
不信東風纔到
閉月三三小徑藏鶯六六彎橋
香囊蟬錦嬾重挑乞取春愁閑了

疎影

湖上見柳影因賦此闋

輕陰冉冉正嫩苔弄碧庭宇深掩千縷柔魂搖蕩
如烟無端忽度闌檻章臺路暗人歸處看足了斜
陽濃淡又幾痕水際低窺近日楚腰全減
依約
勻梳月底亂雲鋪滿徑籠住文簾欲結同心空試
萸苗作去聲就三分銷黯寒添白袷清明後埽不盡
隨風微斂最鏡中再寫秋疎記得踏枝鴉點

桃源憶故人

螢

夜涼那更秋情獨冷
燄雨餘輕撲墜處溼黏簾竹
瞥見因風逐穿烟照水猶難足
小簾窺人新浴
殘月剛移桐屋一箇牆陰綠

惜餘春慢

戊戌三月二十二日汎湖用清真韻

綠徧山腰青迴沙尾花信幾風吹斷屏閒鳥度鏡
裏舟移乍試苧衫綃扇常把禪機破除難負春妍
流光如箭正蘅皋稅駕韞塵不動黛明波遠看
漸是弱絮縈烟新荷鑄水麗景一番熏染初啼鵲
後將噪蟬前池閣嫩晴千變誰道凭闌有人暗憶
年華自憐幽倩且停撓淺酌霏雨霑衣數點

摸魚兒

得汪舍亭婺州晚春見懷詩用蛺蝶巖韻
答之

又騰騰一番春晚無情潮落江浦故人猶憶春前
別不肯載愁流去窗暝處展淡墨吳牋忽見殷勤
語客懷定苦在縠水雙流沈樓一角日日獨看雨
淒涼意不數淋鈴督護風流那減張緒平生我
亦多情者更搯酒邊遺譜還問取問青子綠陰可
記城南路休歌爾汝待再覓郵筒餘花晚筍刻意
爲君賦

臺城路

蠶

青萍葉大桐花落村村又鳴鳩婦細雨如塵餘寒

若水蟻動吳奩時候狸奴聘否怪生客偏憎閉門
長晝守定蘆簾三眠三起似人柳 深窗幾回罷
繡挽籠鉤陌上親費摻手夜屋燈邊曉牆烟外最
怕銀筐飢後心情漸逗記瓦卦曾占簇山將就待
寫雙蛾更呼隣女耦

夢芙蓉

戊戌五月十八日汎舟碧浪湖作

曉天魚板響趁青蘋風起碧鷗波漲一枝塔影斜
裊打雙槳道場山在望仲姬猶賸眉樣劃碎玻瓈
占蘆灣柳汊新雨欲沈網 何處紋簾捲上白紵
歌輕去也終怊悵雙鬟可買應作五湖長水雲連
浩蕩杜郎元是疎放有日重來願身爲鵲鏡妝臉
鎮相傍

永遇樂

戊戌閏中秋

恨海填平情天補就月共秋駐秋半偏雙月圓卻
再減了閑風雨井梧知信又開一葉羅薦較涼前
度想沈沈青冥萬里此情此夜尤苦 殷勤露下
把杯重問也算平生希遇蚪箭聲添鸞簫約爽不
少傷心處干卿何事清輝依舊更按桂花新譜便
鴉啼紋窗影轉忍教睡去

浣溪紗

數到湘琴未滿絃春殘過了摘櫻天芳時卯飲最
思眠 八字眉痕剛半畫二分月影恰重圓第三
橋外見飛仙

蝶戀花

一片東風吹豔雪錦瑟如人忍使華年歇夢去青
溪溪畔月洛神休寫王家帖 非霧非花疑剗鞮
楚客多愁鳳紙新來絕落葉依枝飛又怯秋匳空
羨泥金蝶

霓裳中序第一

宋德壽宮芙蓉石在南權署

牆陰擁翠浪搔首繁華成俯仰藤絡苔皴草長是
親見光堯蓬萊無恙香銷玉葬怕夜深山鬼來往
淒涼處奉華舊閣記否捲簾賞 惆悵疎蛩藏響
雨洗淨嶙峋十丈芙蓉孤倚月幌問點額宮梅已
歸天上冷衙蜂乍放不照到銅溝膩漲青蕪裏宣
和金字也是此情況

宋梅已枯

菩薩蠻

題呵手梅妝圖

斜紅不暖凝酥面春來未許春鶯見小凭侍兒肩
花寒人可憐無言空擁袖蘭氣熏花透髻壓一
枝斜前身萼綠華

摸魚兒

己亥初春過太湖次李秋堂韻

尙怱怱垂虹春早殘蘆風裏如語愁陰不散烟汀
闊一葉輕波翔舞扶柁去望練繞吳城幾點青旗
字鱸鄉社樹想霧鬢風鬟也憐寒峭淺翠照眠鷺
千年事零落荒臺別墅乾坤元是孤旅漫臨匳
鑑驚清影客子何堪塵土須小住看重疊雲衣裹
就湖天暮低眠舊浦續漁具因緣茶人滋味休寫
斷腸句

滿庭芳

寄暢園在惠山下梁溪勝地也引第二
泉穿垣而入匯爲大池有聲幽潺池中
多磐石上芘喬木皆數百年物軒楹倒
影與波澹蕩己亥暮春十有三日汪青
渠邀予來游坐蔭弄水顧而樂之同行
虞山沈生彈箏作秦聲以佐酒因成此
調青渠近買吳姬自杭來家梁溪故戲
及之

屋借峯圍徑隨泉改過橋別是深清闌干十二真
在鏡中行不道黃衫去久風前樹猶帶茶聲江南
好菟裘似此何用買傾城攜朋春已謝梅丸緘
怨蕉紙書情任陰陰隔葉啼老吳鶯明日片帆催

發幽崖畔正有雲生句留住簾紋設否容我聽調
箏

浣溪紗

奔牛道中初晴

莎雨前宵打布帆柳花今日撲征衫催春杜宇怨
春酣 天有心情雲破碧風無氣力水撿藍銷魂
時節在江南

揚州慢

廣陵芍藥

疎雨催妍穉寒凝態天涯相見魂銷問春歸幾日
未盡減春韶算亭北新妝老去不多風露暗展輕
綃送杯中婪尾香心欲話無聊 鴉黃初試記當
年曾識烟苗奈月幌低籠雲堦斜倚夢到迢迢除

卻謝郎俊句無人與淺暈深描想難禁攜贈離情
都在紅橋

賣花聲

徐翩翩書扇自稱金陵蕩子婦

花月秣陵秋十四妝樓青溪迴抱板橋頭舊日徐
娘無覓處芳草生愁金粉一時休團扇誰留帶
人只有小銀鈎句尾可憐書蕩婦似訴漂流

玲瓏四犯

惲正叔西湖汎月圖爲陳玉几賦

寒玉砌瀾脩蛾橫綠青天明月初湧人閒今夕好
柳外涼陰重沈沈兩堤跨竦問何人曲聲吹送酒
面邀秋船頭照影吟思欲飛動烟空遠眸堪縱
想菱颿亂起荷氣深擁清歡驚易曉光景隨塵鞅

南田詞客今仙去
賸沙鳥來成幽夢
誰與共裴回
寫閑情數種

水龍吟

用丁宏菴韻

客懷偏恨秋陰故遮一半
闌干影蜚欺人獨鵲欺
書滯何曾慣聽疊疊吳雲
迢迢楚水悠悠醒枕漫
尋思那日門前銀浦不抵
似關山永凝立風簾
露井可能拌參差簫冷飄
零愁髮蕭條長鋏無言
自領樓月斜初篝烟清後
舊家標韻又新涼陡起
添衣時候作去聲西窗暝

采桑子

晚秋同程松門汎舟紅橋登平山堂

重陽過也成虛負
賴有詩仙肯作延緣
人與黃花

共一船 沿堤轉盡垂楊路水影橋邊山影樽前
畫出傷秋雨後天

高陽臺

題華秋岳橫琴小像

劍氣橫秋詩腸滌雪風塵湖海年年三徑歸來慵
將身事牋天草堂不著櫻桃夢寄疎狂菊磴梅邊
想清游如此須眉如此山川 枯桐在膝冰微冷
縱一絃雖設亦似無絃世外音希更求何處成連
幾時與子蘇堤去采蘋花小艇衝烟笑平生忘了
機心合併鷗眠

尾犯

坐趙谷林西池泊花檻看新種青蘆悠
然動江湖之興

水空雲淨見菰蒲叢外數枝交映稍稍瑟瑟無人
處被荷風吹醒搖波十里遠界破青山影作去秋聲
聲不到秋來要君倚檻閑聽最是淡烟低暝逗
漁燈前浦冷便移栽蕩戶添箇根邊鴨雛游泳捲
葉鳴笳揉花裝被尙遲清興又何似折取橫江相
思還踏三徑

清平樂

風梭織雨萍葉籬根聚水滿蘭橈應斷渡昨夜夢
魂來去春衫起樣休寬偷描一一輕鸞將息釀
花天氣憑他料理餘寒

曲游春

郊外探春作

一水仙源曲被柳條遮斷千縷婀娜有約湔裙怪

逢伊還向重簾單舸出意新梳裏看颺鬢藥黃微
浣縱近來遠似天涯誰倩玉顏初破 禁火心情
偏妥伴錢藕偷分鈿荇輕墮容易斜陽恐穿烟鳳
子尙尋珠唾波面虹橋臥任怨咽玉簫吹過無奈
澹月籠燈翠屏恨鎖

一枝春

城東許氏水軒臨流梨花一株妍淨可
念主人命酒邀賞已半落矣感而賦之
縹蒂無多過清明幾度東闌愁凭飄搖素羽漲曉
乍迷天鏡垂楊倦眼似相見雪融酥凝拌早趁深
淺沾春護惜夢雲輕冷 聲聲鶉鴝催暝憶初籠
香雨烟綃娟靚清蟾墜小瘦減玉兒妝影憑誰看
取好留向繡牀低暎還帶葉偷綴瓊絲晚風未肯

感皇恩

已是殺釭花月籠深閣何處行雲到巫峽一灣流水只有浮萍開闔依稀親記鬪池邊鴨明日暖風蘭紗裁夾玉翦多情度簾押蜜犀蠲忿定帶露痕偷掐幾時頻見也纖紅甲

丁香結

暮春初霽用清真韻

吹落嬌雲展開平碧枝上雨殘猶隕恨流光偏迅數景物賸得鶯憨蜂潤小紅曾記否朝酲帶薄寒自忍可憐游舫散後定是蕪菁開盡相引早鉅釘陰晴花信催過幾陣曲巷幽坊柳絲竹粉翠樓生暈謝家飄蕩紫額翦麴塵盈寸凭闌干那曲冶葉何人摘損

高陽臺

成窯九十九子瓷合金壽門索賦云是
宮中妝具也

秘翠分峯凝花出土依稀粉滴脂函鈿合前塵宮
羅冷卻萸尖浮梁猶有當時月向夜深孤照秋匳
怨長門夢斷蒼龍字漬眠蠶戲嬰圖子誰描得
恰臨妝試仿黛筆重添數比螽斯未曾盈百休嫌
從今舊價卑哥汝宛青娥紅淚偷淹莫銷魂漢苑
瑤箱久落江南

明時瓷器進御者皆出浮梁之景德鎮

眼兒媚

一寸橫波惹春留何止最宜秋妝殘紛薄矜嚴消
盡只有溫柔當時底事忽忽去悔不載扁舟分
明記得吹花小徑聽雨高樓

西江月

春淺初勻細黛寒輕不上仙肌玉梅花下見來遲
夜月深屏無睡心倚紅牋能說情除青鏡難知
試香天氣惜香時人靜街痕如水

三姝媚

櫻桃花

嬌鶯含得未正眠燈風收繁心低綴薄暈微頰學
玉窗勻面紛淹脂淚悄探芳期先占了沿溪桃李
無語銷魂偷折斜枝下堦遊戲休觸蜂須飛墜
到細數圓珠好春流水翠箔深深照一庭隴月暖
香吹碎記挽單衫相送嬾難醒殘醉隔著重簾花
下瞢騰喚起

淒涼犯

庚子十二月二十四日宿濟南敖陽店
寒甚有懷故園節物悽然作此解

疎林宿鳥柴門裏凝塵半榻誰埽倦程繫馬風刀
裂酒雪花欺帽何時古道看長倚敖山翠小又燈
昏寒星照戶不使客愁少 鼓枕尋思處畫句爐
閑印梅窗杳歲殘氣味歎詩人在家貧好底事飄
蓬竟輸與蛾兒夜鬧恐明朝漸看鬢影似暗老

慶清朝慢

辛丑長安元夕同王雪子金繪卣集汪
西亭水部寓齋賦

埽雪燈樓障風酒幕千門春散京華閑情似夢小
歡深醉銷佗莫趁走橋人去故園伴侶在天涯當
杯有一般好月燭影初斜 簫鼓隔牆未厭況水

曹詩俊淡墨棲鴉疎香共憶窗外應少梅花從此
滿城鬪草細娘催上卓金車心期遠鶯邊古寺雁
外晴沙

玉漏遲

永康病中夜雨感懷

薄游成小倦驚風夢雨意長牋短病與秋爭葉葉
碧梧聲顫溼鼓山城暗數更穿入溪雲千片燈暈
翦似曾認我茂陵心眼少年不負吟邊幾慰帛
光陰試香池館歡境消磨盡付砌蟲微歎客子關
情藥裏覓何地烟林疎散懷正遠胥濤曉喧楓岸
百字令

月夜過七里灘光景奇絕歌此調幾令
衆山皆響

秋光今夜向桐江爲寫當年高躅風露皆非人世
有自坐船頭吹竹萬籟生山一星在水鶴夢疑重
續拏音遙去西巖漁父初宿 心憶汐社沈埋清
狂不見使我形容獨寂寂冷螢三四點穿破前灣
茅屋林淨藏烟峯危限月帆影搖空綠隨流飄蕩
白雲還臥深谷

憶舊游

辛丑九月旣望風日清霽喚艇自西堰
橋沿秦亭法華灣洄以達於河渚時秋
蘆作花遠近縞目回望諸峯蒼然如出
晴雪之上菴以秋雪名不虛也乃假僧
榻偃仰終日唯聞櫂聲掠波往來使人
絕去世俗營競所在向晚宿西溪田舍

以長短句紀之

溯溪流雲去樹約風來山翦秋眉一片尋秋意是
涼花載雪人在蘆漪楚天舊愁多少飄作鬢邊絲
正浦漱蒼茫閑隨野色行到禪扉忘機悄無語
坐雁底焚香蛩外絃詩又送蕭蕭響盡平沙霜信
吹上僧衣憑高一聲彈指天地入斜暉已隔斷塵
喧門前弄月漁艇歸

聲聲慢

題符幼魯風雪歸舟圖

征衫換色客枕催寒川塗自古酸辛楚尾吳頭風
雪獨自歸人低迷凍鷗片影恐吟魂攪亂江雲遠
望外有敗蘆斷竹何處孤村莫怪蒼山白首看
淒清到此愁也如君溼重帆遲贏得畫裏閑身灘

空夢回犬吠正鴻妻相候柴門待歲晚酌椒花全
未是貧

長相思

綠萼梅

生九疑住九疑自小山光染玉姿碧羅天上飛
春到時雪到時獨向花中咏綠衣斷魂烟月知

沁園春

心

一寸通犀脉脉難窺含無限情記鍼纔棘刺捧時
尤媚鎮餘銀液捫罷偏驚小恰容憐芳能颺恨莫
近彈碁最不平羅襟掩歎幾曾灰盡半爲琴聲
覆蓮狀未分明愛慧性玲瓏在目成乍歡娛著處
怵如危柱別離催就亂若懸旌門裏輕挑秋來暗

合閑悶閑愁特地生花前見算除非換得方表深
盟心吳文英詞何處合成愁離人心上秋顧夙詞
換我心爲你心
始知相憶深

齊天樂

秋聲館賦秋聲

簾淒燈暗眠還起清商幾處催發碎竹虛廊枯蓮
淺渚不辨聲來何葉桐飆又接盡吹入潘郎一簪
愁髮已是難聽中宵無用怨離別陰蟲還更切
切玉窗挑錦倦驚響簷鐵漏斷高城鐘疎野寺遙
送涼潮鳴咽微吟漸怯訝籬豆花閒雨篩時節獨
自開門滿庭都是月

賣花聲

壬寅立春日作

春信一番新春水生鱗春花春鳥尙逡巡翦就釵
頭春勝也添箇春人準擬踏春塵春色初勻春
風困著小腰身製就春詞知幾首帖寫宜春

西湖月

明慈聖李太后賜畫九蓮觀音像在靈
隱寺借秋閣

恩恩夢了華胥早驚嶺窗前貯將圖畫翠瓔長帶
銖衣細疊冷綃光研巖居瞻瑞相展一檠松風塵
外挂任水際苦入秋心依舊九蓮開也署年髣
髴神宗說侍養深宮白頭閑話月輪圓裏山河小
影似驚飄瓦興亡多少事便指與枯禪應淚灑已
零落阿監當時奉香黃帕

綺羅香

壬寅春分約徐丈紫山同賦

水榭收燈虹梁待燕判斷韶華如許九十芳辰一
半自今堪數嬌意緒欲暖翻寒嬾心性乍晴還雨
已飄殘梅雪鱗鱗井桃花信未遲暮 簫樓應惜
冶思誰在生香徑裏和鶯低語約略東風好似破
瓜眉嫵剛宿露蝶夢攙勻更惹烟柳絲偷取悵年
時一掬春愁試分知解否

阜羅特髻

賦包頭

膠鬟攏罷稱滑笏吳綃摺成如水淺絢素額更斜
遮蟬翅重窺鏡非關怕冷上頭初愛道隨時世最
宜淡泞恁略施珠翠 還把一痕緜擘襯微微紅
起春愁困莫教半卸到殘妝秀暈分明是碧烟抹

斷看兩蛾尤細

夏初臨

初夏雨中同蔣丈靜山汎湖

蘸就魚天搓成鷗雨空濛撥櫂遲遲無數蘋花輕
香點破漣漪遠風沿岸斜吹溼青篷誰弄參差湖
心亭柳千條暎波纔是愁時可憐春去追送今
朝破除酒病更鬪檣旗簾釘窗眼曲游俊侶都非
那不淒迷放殘陽綠過橋西記蘇堤衣香後船柔
櫂枝枝

喜遷鶯

初夏

竹香新引漸綠到岸東茶蘼吹盡描繡心慵行棹
聲歇長日瑣窗清潤閑臨小風揮扇涼思先歸鬆

鬢爲誰瘳。韞單衫，尙束春前幽恨。芳信緘密意，
蠅字玉釵待掐。榴巾問鬪茗樓前，澡蘭屏底猶記
那回眉印。幾絲絲麝煤飛度，山枕天涯，翻近夢催破。
聽迎梅雨，點敲簷初緊。

八歸

隱几山樓賦夕陽

初翻雁背旋催鴉翼，高樹半挂微暈，銷凝最是登
樓意。常對亂波紅蘸，遠山青襯，不管長亭歌欲斷。
漸照去，鞭痕將隱，想故苑燕麥離離滿地，弄金粉。
何況春游乍歇，花愁多少，只惱黃昏偏近冷和。
帆落慘連笳起，更帶孤烟斜引，誤雕闌倚徧霽色。
明朝也應準無言處，望中容易下卻西牆相思人。
老盡

大聖樂

東園錢春追和草窗韻

空苑游絲舊池飛燕薄陰千樹正小闌人意厭厭
細數亂花翻怨錦鳩呼雨皺得綠波新如倦似無
奈啼綃臨別浦春何在在南陌麴塵西窗烟縷
閑思古今事苦有紫曲青樓千萬語且寄愁彩筆
橫塘重見楊枝應許尙戀淺寒羅衾曉記門掩紅
香深院宇傷飄泊是誰倚疎簾吹絮

雪獅兒

華亭錢葆汾以此調詠貓竹垞翁屬和
得三闋徵事無一同者予與吳繡谷約
戲效其體凡二家所有勿重引焉昔徐
鉉與弟錯共策貓事鉉得二十事錯得

七十事作此狡獪殆非詞家清空婉約之旨觀者幸毋以夢窗質實爲誚也

雪姑迎後房櫳護得黃清明潤撲罷蟬蛾更弄飛花成陣穿籬遠近未肯傍茸氎安穩念寒夜偎衾煖處夢尋燈暈繞膝聲聲低問似無魚分訴憐

伊嬌困展膊屏前髣髴三生猶認懷春最恨漸取

次歸來難準瓊籤盡上案晴蟾鋪粉白雪姑貓名

葉紹翁貓詩醉薄荷撲蟬蛾見隨隱漫錄張良臣

山房惠貓詩從來憐汝丈人鳥端正銜蟬雪不如

上海歸來聲繞膝定知分訴食無魚又祝貓詩江

上孤蓬雪壓時每懷寒夜暖相依從今休慣穿籬

落取次懷春屢不歸吳仲孚貓詩弄花撲蝶悔當

又

年喚到殘糜味卻鮮不肯春風留業種破瓊尋夢

佛燈前名畫評何尊師貓有展膊者金王良臣貓

詩三生白老與烏圓徐集孫詩亂葉打窗貓上案

前題

花毛褐染炎天尚記荷塘爭浴鼠卜閑時畫損砌
 苔幽綠闌干幾曲任側輓橫眠初熟恰又斂脩脩
 金尾蝶衣偷蹴忽起驚跳風竹聽蠅鳴茶鼎何
 曾輕觸暮眼纔圓香綺叢邊看足簷聲斷續休喫
 盡草芽盈掬娛幽獨勝了狡狴鏤玉西陽雜俎楚州射陽出貓
 有褐花者野雅貓亦如虎畫地卜食俗謂之鼠卜
 元好問貓詩側輓橫眠卻自如錢惟善貓詩秋花
 石上玉狡狴金尾脩脩斂四蹄唐盧延遜詩貓跳
 觸鼎翻野雅貓早暮則眼圓宋張至龍詩貓臥香
 綺叢田家雜占
 貓喫青草主雨

又

前題

妝樓鎮臥底須詰取於菟癡小解事吳娃戲學鳳
 仙親擣紅絲繚繞便萬貫呼來還少防失卻裏蹄
 重鑄閑坊尋到蟋蟀吟中醒悄正無聲四壁立

殘斜照不捕依然堦藥紛披藏好攜兒乳飽坐榻
畔微溫相惱春回早八九牆陰新埽詰貓詩劉後
村作柳貫貓
詩花陰閑臥小於菟癸辛雜識回回國婦女以鳳
仙花染貓為戲秦氏女孫失貓下臨安府訪之不
得賂以金貓乃已袁桷醉貓詩醒來獨立闌干畔
四壁無聲蟋蟀吟李霽之畫貓在藥苗間程鉅失
貓詩金絲色軟坐常溫飽食深宮錦作墩古諺云
八九七十二貓犬尋陰地張搏家貓名萬貫兒記
珠事

又

前題

稱伊虎舅斑斑璫瑁身邊頻覷食有溪鮮又上小
庭高樹如丘拗怒想喚汁多應回顧何事費峨眉
畫手穴中空怖延頸盤旋爭赴笑綠沙幃底深
憐羣聚銷得侯封也算北門長護青錢百數買雙
耳微痕添鋸窺鸚鵡月季花前亭午陸游詩自注
俗謂貓為虎

舅教虎百爲惟不教虎上樹殺鼠如丘用柳文白
斑湛淵靜語脣音汁汁可以致貓聲類鼠也宋僧
道宏峨眉人往人家畫貓則無鼠南部新書連山
張大夫搏好貓每視事退入中門數十頭曳尾延
頸接入以綠紗爲幃聚其中以爲戲金李之純貓
飲酒詩只向北門長臥護也應銷得醉鄉侯說苑
耳騷驥駢使之後有缺如鋸丘餘慶畫有月季貓

思佳客

吳中作和繡谷

窄窄紋窗小小舟空波一片漾難收滿天細雨曾
成夢壓水涼陰半倚樓深玉琰暖香篝夾紗衣
薄不曾秋吳中舊事君知否晚泊荷花爲洗頭

原作

吳焯

江上涼雲江上舟闌門晚市未曾收銀絲燈暎
東西水梔子花香上下樓分半臂理雙篝河
風蕭瑟夜如秋琴臺一點西施月猶照吳王城

上頭

樊榭山房集卷九

漢書山經卷之六

土通

樊榭山房集卷第十

錢唐 厲 鶚 太鴻

詞乙

東風第一枝

癸卯元夕雪晴

拂柳蛾消妝梅鶴瘦玉烟吹散無影放教明月初
圓最憐倚篝漏永街泥不斷已減卻燈邊遊興料
粟肌籠袖香留笑裏有人偷並 占響卜紫姑誰
證思舊約素娥暗省一番花信添寒十分草痕洗
淨凝情買夜漫再認飛鸞窺鏡悔少年爭逐輕塵
得似煮茶風景

浣溪紗

磬折春波吹婢魚粉塘烟竹迴蕭疏此中堪注水

經無 蘭語脆疑鶯谷近柳情慵覺燕簾孤晚風
休減玉肌膚

高陽臺

落梅

縞月啼香青禽警瘦遺環與恨俱飄雪沒鞦韆痕何
人爲埽溪橋東風欲避層臺遠御風歸第一春銷
惱相思枝北枝南冷夢迢迢 山空記得吟疏影
拾參差片腦自裹冰綃湖水無聲流殘舊怨新嬌
餘酸已在濃陰裏怕重屏半萼難描更堪他消息
經年雨暮煙朝

木蘭花慢

城西開元宮本宋周漢國公主府元時
句曲外史張伯雨入道於此外史開元

宮得月軒詞有環堵隘花狼藉溝水漲
雲充斥似石魚湖小酒船寬窄之句今
闌入軍營中僅矮屋數楹奉高真像旁
有隙地積水縱橫猶是當日陳跡也雍
正癸卯二月十九日過之書此以貽訪
古者

自吹簫伴去還再住列仙儒想瑤草呼龍梅花待
鶴詩鬢慵梳平生愛尋先隱冷襟懷要與俗人疏
可惜風騷零落而今纔到清都漫郎曾賦石魚
湖流水繞堦除賸一片涓涓斷雲新柳照影荒渠
宮匳已銷餘豔覓彩毫何處寫黃圖說與游人記
得羽觴汎也應無

點絳脣

次韻答紫山見寄

節近清明一池春綠蛙催雨凭闌無緒目送年芳
去擬剪湘天不供牋愁句相思苦花無重數紅
認斜陽暮

原作

錢塘

徐逢吉

紫山

似箭流光梅花雪後櫻桃雨忽忽離緒春要平
分去記得年時共賦銷魂句今何苦落花無
數人隔春城暮

思佳客

柳

自琢新腔唱柳枝段家橋外水仙祠絲輕最在無
眠處腰弱尤看不舞時鶯一囀笛孤吹碧波澹
澹影依依春風若爲長條惜應遣情人少別離

少年游

春日訪紫山同坐學士橋望湖

南屏新畫西泠小
隱動卽到君家船
載湖光橋分野色
一鳥落雲沙
十年無限傷春意
說與小桃花
結客金空游仙枕
在風外祝蒼華

絳都春

清明風雨

烏衣過客約孤注
賽春春還輕擲潤
被換香低几留燈
愁通夕餘寒猶是
連寒食強偷眄清
明天色傍簷攜手
茸茸柳眼淚痕頻
滴敲側前年舊旅
寄單枕悶把臥枝
花摘水外澹紅簾
底纖瓊游蹤隔文
園多病何人惜有
鬢影參差知得便
教晴蝶敲風岸陰
翠織

瑞鶴仙

賦聖幾齋中牡丹名藕絲霓裳種來自

亳州

海天霞未卷和曉岫空青付誰裁剪花師戲成幻
約嬌春千里翠深紅淺回頭意嬾但微認崔徽背
面暎衫痕一色惺忪誤道藕絲秋半曾見夢中
彩筆歌畔檀脣醉餘羅扇雲窗月館湖山在舊情
遠便聽風聽水霓裳譜得自對珍叢夜怨問尋芳
人瘦如何細看帶眼

念奴嬌

甲辰六月八日予將北游東扶聖幾餞
予湖上泊舟柳影荷香中日落而歸殊
覺黃塵席帽難爲懷抱矣因用白石道

人韻歌以志別

孤舟入畫怪人閒
誰寫漁朋鷗侶起
坐不離雲鳥外
倒影山無重
數柳寺移陰
葑田拖碧花氣涼
於雨詩成猶未遠
蟬吟破秋句
忽記身是行人勞
君把酒慙揖湖光去
共惜風亭今夜笛
月逗離聲前浦
千里幽襟一堤野
思終擬將家住
甚時攜手水蒹搖
曳煙路

好事近

吳江月夜

夾岸響青蘆
瑟瑟吳波搖
碧天借一帆
風勢看垂虹
秋色滿船明
月照無眠
今夕是何夕
應被素娥笑
我太疏狂蹤跡

點絳脣

題授衣讀書稻田隅圖

片雨斜陽柳陰濯足看行水世閒良計識字耕夫
耳風約雲萍又向蕪城會推書起酒闌無味爲
我言田意

菩薩蠻

馬佩兮梅花卷子寓騎省之戚徵予賦
此

微波冷託湘筠色高枝早信尋難得玉骨不爲泥
輕於雲一絲鏡花留半影最薄東風命楚角莫
飛聲人閒無此情

蝶戀花

長安秋雨夜賦

曲巷低窗雲色暮節近黃花又下淒涼雨長記江

南楊柳渡孤篷翦燭曾聽處 悔別翻將書信誤
雁落吳天已是愁難訴今夜長安千萬戶相思不
爲砧聲苦

定風波

甲辰冬杪南歸過邗城被江見留酒閒
款語忘暮月黑江寒行五六里送至舟
中而別到家旬餘被江書來作此寄之
記來時傍柳維舟歸人一寸心折歲晚高鴻天寒
脩竹欲下山陰雪硯香凝酒鱗熱語短情長不成
別淒咽悔秋燈種了星星僧髮 野橋路滑聽江
聲送客愁如結又空林門掩疏簾夢阻低共梅花
說杜陵荒浩歌發猶有詩傳布衾鐵天末幾時同
看蕪城明月

疎影

菊影和祓江

幽姿欲舞見棱棱幾葉空際微吐半枕游仙飛作
輕雲不怕滿城風雨琉璃屏上秋多少也澹到痕
無描處記昨宵灑背新霜翠袖燈窗戶 尚有籬
根淺醉敲斜簪帽底曾費回顧笑問尊前人瘦如
花花瘦可憐如許東西活脫殘枝畔合賺得閑情
詞賦待醒來重覓橫陳低捲小簾寒曙

解語花

春日見閨人搗鼓

簾遮晝影釵翦春痕香度深深院玉嬉鶯婉無愁
處小坐釘花牀畔飛空碎遠看一朵翠翹難顫驚
夢回聲落高唐白雨隨酥腕 長記柑筵飲散遇

紅蘭潮靨青柳垂眼唾霏休濺飄鸞袖應是細敲
腸斷微音弄釧料無此漁陽嬌怨生晚寒燈暈妝
樓敲被池人倦

琵琶仙

乙巳早春過吳門作

帆色新年又輕約水枕春寒同載堤上沽酒人家
湘梅已先賣斜照傍紅樓未啓惜猶護一層芳靄
趁燕羣歸調鸚檻遠塵夢都改 悄彈指閑立平
沙更吹綠吳波緩衣帶堪笑天涯蹤跡有垂楊相
待人意與東風是客洗軟香雨際煙外且聽鐘度
楓橋舊情如在

又

康山在揚州輦土爲之以康對山寓此

得名今屬吳氏乙巳二月四日被江招
飲其上四顧曠然俯仰今昔同集者尺
鳧授衣各賦一解

休恨無山小闌外略借江南眉色何況山在人家
梯青喚雙屐吹不斷風前笑語怕驚起退江簾隙
古堞飛帆平林指塔春望無力舊知己觴送花
迎畫歌舞屏閒未頭白誰道琵琶纔搯賸康家陳
跡豪氣被蕭蕭草樹甚曳裾有此狂客爲問天畔
歸鴻遠愁銜得

摸魚兒

蕪城清明

杏餠香闌花門巷家家風外晴穩來時猶道江程
短定不短如愁鬢飛絮近作去聲酒惡寒輕只是無

人問紅絲硯潤便杜老傷春江郎賦別難寫此時
恨 西湖路最愛山聯眉暈游船曾記歸盡綠楊
闌角聽鶯坐知我平生疏俊情一寸回首處雲容
水態還相引天涯自哂繞九里街中三分月底誰
與寄芳信

掃花游

乙巳三月二十三日客揚州空齋積雨
孤愁特甚問人始知是春盡日也黯然
於懷賦寄尺牘

折花汎舸又夜淺燈孤綠陰如許舊遊閒阻聽簷
聲壓酒醉醒無據落魄多愁尙記羅帶雁柱向南
浦訝楊柳今朝腰瘦慵舞 行徧深院字已負了
春來忍教春去笑人易誤似山中枕石頓忘時序

小榼櫻桃更憶西園勝聚寄情處畫當年滿湖煙雨

摸魚兒

首夏歸杭過吳淞景物清曠有會而作
綠陰陰江南千樹重來桃葉依舊十年不負煙波
興付與殢人杯酒船喚否度一片涼雲最戀河橋
柳凭闌望久趁螢影高低漁歌斷續搖過五湖口
歸非偶正是清和時候深村樂事多有焙茶煮
繭梅風裏換得霜鱗盈斗詩思瘦待小草湘蘭已
入騷人手西泠永晝汎五日輕橈獨醒何事散髮
醉還又

喜遷鶯

賦趙谷林三十六鷗亭

風蒲低暑見白羽帶波翻翻還住闌影搖人簟文
生夢夢入藕花深處閑笑汎湖伯越閑笑啼湘懷
楚晚涼外動忘機一曲悠然琴趣休去尋釣艇
重理舊盟草合垂虹路倚扇開襟調冰膾玉不問
是誰賓主三十六梯明月三十六陂秋雨戲招手
認青天片雪飛來詩句

鬪嬋娟

題趙飲谷采香詞居近滄浪亭自榜曰
小吳船

中吳煙水微茫地吟邊何限清感夜深腰笛伴漁
謳冷玉花千點翦秀骨香霏露染娃宮風景教長
占錯羨舟居好幾雁齒橋頭解纜回首銷黯仍
是載酒年時驀然低憶蕙爐絲裊菱鑑斷腸重唱

小橫塘粉字開還掩縱賀老心情未減無端世味
如雲淡好約我垂竿手斜雨梅黃凭君畫檻

探春

次趙飲谷韻

冷硯敲秋枯筇倚晚西風斜掠平楚芋熟湖田楓
明水巷先放煙鴻飛去還似春時節埽不盡閑愁
吹絮暖紅院落誰家迎寒猶試簫鼓 此際青門
曾住記曉碾霜輪未教離阻老大才華淒涼身事
銷得箜篌知遇三五回圓月怕靜夜窺人良苦待
問梅花何時香拂衫縷

一萼紅

丁未始春客吳興郡治後圃有愛山臺
南宋時建蓋取東坡尙愛此山看不足

之句日與客登其巔蒼弁清茗奔赴襟
舄情味灑然如遇白石草窗諸名勝於
五百載上乃歌此曲以寄予懷

乍寒輕被鄰園翠羽喚起愛山情煙草殘碑風榛
斷笛千載誰記經行想春在樓痕幾曲破曉霽妝
鏡見飛英欲雪消時無人知處峨眉青青飄瞥
少年前夢便移舟弄水有若平生西塞魚肥東林
酒熟滋味何似浮名待傳與蘋香暖信醉吟地常
憶柳邊城回首家江非遠十四長亭

水龍吟

梅雨初霽湖上山水浮動涼氣沁人肌
骨尺鳧買舟約予輩數人緣孤山掠蘇
堤入西林橋以泊於裏湖時意林鼓琴

敬身作小篆數幅樂城觴碧筩勸客予
與尺鳧各賦此曲極暮乃罷去丁未五
月二十五日也

蜻蜓偷眼涼多飛隨小舫搖空翠西泠五月碧羅
初染冰壺乍洗多麗香車閑情椒壁夢塵空徙載
荷心酒苦桐枝絃澹看一陣風漪細更譜玲瓏
散水戰長林葉閒疏吹高寒更憶迴峯隱舍鳴泉
僧寺易得驚秋菰蘆深處此歌堪倚漸鐘催人散
平波墜露點青螢尾

清平樂

題飲谷說劍圖

仙源風雅不恨知音寡艇子采香歸去也袖有驪
珠無價天涯共話秋窗吹簫載酒何妨莫把吳

鉤再看燈前化作柔腸

意難忘

丁未冬杪客蕪城將歸次飲谷送別韻
舊苑荒灣正怱怱別袂草草歡筵放歌銷白日轉
枕夢青天風力緊折吳縣寒色漸蒼然話倦游不
如歸去如此湖山 津頭已買篷船尙樵歌共譜
琴趣閑編沙河春拊馬燈市夜飛蟬花倚擔菜登
盤節物又增年問幾時掀顛一笑追逐吟仙

原作

嘉定趙虹飲谷

埃火沙灣聽戍樓壓笛人罷離筵雁聲寒墮地
霜色白彌天思結託奉纏絲小別轉悽然對斷
魂月搖津樹雪罨寒山 載將書畫歸船有東
城別錄南渡遺編眉添京北柳衣畫孟家蟬翦

綵勝簇春盤轉盼入新年待與君尋梅問鶴共
訪逋仙

蝶戀花

戊申春暮城東周氏小園池上作

三月風顛吹斷柳何況薔薇落處依苔厚折得一
枝花在手戴花人尙平安否行徧回塘銷永晝
水影蘋香只是侵襟袖杜宇數聲春欲瘦斜陽豔
豔醺如酒

憶王孫

懷紅橋舊游

小秦淮映小紅橋蘭舫重來酒未銷秋雨多從蟬
鬢飄夢迢迢曾倚闌干弄柳條

謁金門

七月既望湖上雨後作

凭畫檻雨洗秋濃人淡隔水殘霞明冉冉小山三
四點艇子幾時同汎待折荷花臨鑑日日綠盤
疏粉豔西風無處減

水龍吟

春晚倚樓見海棠葉底餘花同谷林賦
殘春能幾番風猩雲一朵藏深翠嫣然最小窺人
闌角憐伊睡起羞見當時天衣宛薛宮鬟垂地歎
宣華舊色鳥聲啼盡遲開處伶俚矣 尙恐朱顏
易老倩薔薇殷勤鉤袂樓高十二妝輕粉瘦綃痕
寄淚雨雨風風鈴兒未掣蜂兒先退待解愁知道
前身記得晚花流水

國香慢

壬子冬至後三日過馬半槎南齋炙甜
香以供客風味幽絕前明宣宗時禁中
製也坐上索予譜斯闕成半槎謂予云
昔熊訥齋請詹天游賦輒香慶清朝慢
云願埽陳言君於此題當與天游競爽
矣明日以綠牋請予書之裝成小軸高
西唐篆其首曰甜香新唱

雨浥芳塵愛花瓷寶屑百種芬氲誰將蜜脾滋味
散作濃春顫裊微煙猶未寫蘭韻如幻如真輕翻
小銀葉舌本先參鼻觀徐聞漢宮遺事遠歎尋
方難和按譜偷分茗甌初啜依約攪了餘薰縹緲
華胥一枕蝶飛來猶戀梨雲回思殢人處寄與當
時浣罷羅巾

澡蘭香

癸丑淮南重午用吳夢窗韻

荷聲碧檻蒜影紋簾詩在枕根夢覺釵邊綴虎扇
底彈蠅輸與彩舟佳約記琵琶初見灣頭纔舒新
眉半萼立盡梅陰晚雨猶鳴青翳贏得星星短
鬢羞照江心一規銅魄涼生楚簟怨人宮砂多少
玉窗羅幕想南湖十頃菱波閑了微吟淺酌還認
取天際歸帆飛鳧闌角

西江月

秋晚同嶰谷登煙雨樓

淨玉塔前風色銷金鍋畔晴瀾都來收拾一樓閒
只少青山數點望眼蒼黃越樹醉魂清冷吳天
柳邊猶繫五湖船西子煙中去遠

摸魚兒

塵梅追和元人顏吟竹

怪朝來凝芳盈席一枝幻出清瘦紛紜不用將犀
辟付與散花摻手無乍有想漠漠輕寒昨夜穿窗
透紗籠護否恐疎朵橫陳探春多誤更與灑冰溜
偷描處漫比脂妝玉鏤寓形休污吟袖鹿胎幾
點閑蹤跡驚覺軟紅回首延望久恍翳月吹煙正
是開時候高情似舊笑學字蕭郎低徊未拂香影
寫難就

同作

錢唐

陳臯

江臯

綺窗前埃凝髵几春葱閑鏤疎影園林半樹移
來幻似霧似煙還暝看未定想京洛餘情喚起
南枝醒冰姿乍認向匣鏡開邊歌梁落處忽動

灞橋興 嬋娟面正似輕綃掩映恨無半點香
牘莫教瑟瑟翻飛去吹落芳英難整空裏景偷
墮處前身水底還堪證風沙漫競好模上苔牋
依然離垢心在玉壺冷

踏莎行

嘉禾道中和江臯

鴨鴨隨波鶯鶯坐樹天涯芳草疑無路惱人只有
燕梢船濃春又向船中度 鬪酒香留題襟墨聚
菜花黃了忘歸去韋娘髻子曉妝成今朝定出湔
裙否

項臯謨筆記云嘉定中禾妓杜韋作實心髻
低小尖巧至晚常如曉妝時人效之號韋娘

也

露華

玉簪秋海棠同置小餅詞以寫之

楚雲夢遠覓鬢底瑤肪悄在秋苑素萼乍敲遮住
青鸞輕扇最憐付與紅兒只隔幔紗遙見涼颼度
嫣然笑拈開掃初綰 明河墜露分半稱香浸銅
餅臙粉零亂幾點唾壺情淚翠襟吹濺倚妝靜看
搔頭又恐一枝敲斷丹白想亭亭夜深自遣

浣溪紗

乙卯冬日同抱樸載酒過湖酌耕民殯

宮作

一櫂迎霜拂曉開非關乘興訪疏梅斷雲叫徹玉
龍哀 雞酒有情應戀此湖山如夢可重來隴泉
幽咽語初回

南鄉子

題揮扇士女圖

思夢髻慵梳鸚鵡驚回倚井梧扇影似人人似月
圓初十六盈盈十五餘並蒂點紅蕖更有關心
好句書不用近前頻掩面生疏水院雲廊見也無
蕙蘭芳引

乾隆丙辰秋七月十日行郊城道上殘
暑猶熾夾道楊柳依依慙有慰于倦旅
予自庚子冬經此已十七年爾時樹猶
未種也江潭憔悴之感在人更有甚于
樹者賦此闕書旗亭壁

塵沁短衣話前事倦途亭午向畏景新秋官柳自
垂萬縷繫人舊感問翠黛那時何處等再來瞥見
付與騾綱鈴語粉絮吹簾柔枝縈扇擁髻曾訴
念好箇江南爭似路旁低舞少年容易鬢霜早聚

顚顚多長夢畫橋煙浦

一絡索

風走葉聲簾底夜長燈細秋塵不肯洗征衫有前
日分攜淚暗憶餘香殘醉幾層煙水分明新夢
到伊行但道得相思字

惜奴嬌

深院無人看分月紋疏小閑情約青奴漫惱藕惹
冰絲悄一似紅衣拗曾道賦微涼單棲悟早露
簷煙襟可暗憶凌波櫂垂楊髻幽花玉照夢繞香
瓊又喚醒煩塵埽秋到休更怨西風草草

天香

煙草神農經不載出於明季自閩海外
之呂宋國移種中土名淡巴菰又名金

絲薰見姚旅露書食之之法細切如縷
灼以管而吸之令人如醉祛寒破寂風
味在麴生之外今日偉男髻女無人不
嗜而予好之尤至恨題詠者少令異卉
之湮鬱也暇日斐然命筆傳諸好事

瀛嶼沙空星槎翠翦耕龍罷種瑤草秋葉頻翻春
絲細吐寄與繡囊函小荷簫漫試正一點溫磨相
惱纔近朱櫻破處堪憐蕙風初裊嬌寒戰回料
峭勝檳榔爲銷殘飽旅枕半敲熏透夢闌人悄幾
縷巫雲尙在濺唾袖餘花未忘了喚剔春燈暗縈
醉抱

虞美人

游絲不惹東風住和悶閑吹絮嫩寒猶護小窗紗

試比去年今日瘦些些
飛紅只在迴塘裏塘下
差差水水邊杜宇盡情啼喚得春歸何似喚郎歸

杏花天影

丁巳秋日舟過荷葉浦作

蘋花纔報西風信早添得清愁上鬢短蓑開合雨
濛濛借問小平橋斷戍近沿明鏡紅疏翠暈聽
依約菱歌去盡已涼天氣別人時未穩倩行雲爲
寄恨

醉太平

戊午暮春汎舟紅橋同授衣廉風聯句
楊花滿天榆錢滿船太鴻綠陰湖上年年問誰尋翠
鈿授衣橋邊酒邊樓前眼前廉風夕陽一角闌干對

春風可憐太鴻

減字木蘭花

過張無夜花龕

竹垣花架四面陰陰堪結夏
手捉松枝君是前身
鶴阿師楞伽堆案欲話無生
誰是伴久斷知聞
一縷茶煙裏作雲

水龍吟

半竿殘日江城平蕪寒色新來淺
舊游似夢閑身
如葉闌干凭徧老去劉郎芳溫
一念最難消遣
況雨聲不管愁人厭聽更長處和啼雁
無計憑他
酒殘奈依然酒醒天遠絲占蟾子香
盟心字關情
在眼碧鏡春酥青綾秋夢紫簫幽怨
待佗時絮語
西窗今夜把蘭燈翦

湘月

揚州勝處惟紅橋爲最春秋佳日苦爲
游氛所雜俗以大舟載酒穹篷而六柱
旁翼闌檻如亭榭然每數樓並集或銜
尾以進則煙水之趣希矣戊午十月十
七日風日清美煦然如春廉風莧亭賓
谷葑田招予與授衣于湘喚舟出鎮淮
門歷諸家園館小泊紅橋延緣至法海
寺極蘆灣盡處而止蕭寥無人談飲閒
作亦一時之樂也懸燈歸櫂吟興各不
能已相約賦念奴嬌鬲指聲一闋而屬
予序之

客游未嬾記名園水鑰誰與重叩淡寫霜痕愛到
處吹盡尋常歌酒斷淑通煙疏籬借暖尙挂微黃

柳移船遙去照人都爲詩瘦 何地更著功名天
教老子付垂綸閑手細數闌干問往事春共橫波
爭秀亂影風燈催歸晚笛眷此情依舊城頭生月
作去聲成鄉思時候

風入松

憶茶

陸家休更說遺經負了雨前盟當時風月花瓷畔
餘甘漱幾許看承戲語從佗歐九困人不止春醒
爲茶作病病皆清關鬲有凝冰而今卻費閑薑
桂開芳焙可是忘情一棧微聞蘭氣半簾時夢松
聲

角招

予與趙谷林長安別三年矣戊午初冬

谷林自北歸相見于邗城塵衣風帽同
話舊游悽然棖觸予懷也家山漸近又
復薄遽分手予歸杭當在冬杪谷林家
西池梅花下談讌之樂計日可待因用
白石老仙自度曲所云黃鍾清角調者
製一闋寄之

話離索相逢又是江天雁影寥廓近來偏憶著並
馬去程茅店山郭情懷最惡向舊日淮南樓託看
盡人閒迎送似官道柳垂垂任西風梳掠 休莫
琴移別調塵銷古怨此意真如瘡夢歸煙漠漠題
扇書羣三年前約吳船乍泊早問取疏梅池閣爲
怕寒香瘦削想翻笑我歸遲延春酌

步月

己未歲吳山燈市甚盛用史梅溪韻

瞰月峯高看街簾遠物華取次如歸夜深寒淺春
在六銖衣望來處紗籠萬點見背後釵燕雙飛疏
梅下星移漢轉勝似拜安妃 塵霏行不斷踏歌
伴輦舞隨地成圍天教晴穩樂事往年稀念游侶
餘醒尙在問殢人香夢誰知匆匆裏錫簫又曉透
羅幃

樊榭山房集卷十

Blank manuscript page with vertical columns and a red mark.

僕詩前集自甲午至己未凡二十六年僅編成八卷詞二卷附焉己未至今辛未十二年來復次第成續集如前之數豈中年以往之作工于少時邪自念齒髮已衰日力可惜不忍割棄輒恕而存之幸生盛際嬾迂多疾無所託以自見惟此區區有韻之語曾繆役心脾世有不以格調派別繩我者或位置僕于詩人之末不識爲僕之桓譚者誰乎後綴詞一卷北樂府小令一卷則年來因詞而及之雖乏酸甜風味或不至貽笑傖父面目也樊榭老民厲鶚

序

樊榭山房續集卷第一

錢唐 厲 鶚 太鴻

詩甲

綸長敬身東扶次韻見和有招予卜居城南之意仍用前韻奉答

千萬云買鄰附勢別有見緬彼南村人素心皎秋
練吾鄉古城南取友洵多善何論天尺五不隔旬
浹面戴君罷微官生事尙流轉長吟肆滂葩令我
欲焚硯丁君老被褐元圃懷玉片文雅終見疵揚
意豈能薦張君清粹姿藥樹託深眷妙語發哀彈
未數空梁燕殷勤招隱篇如以乘韋先東野若移
家借車百事遣同巷古所敦誼更重游串秋燈分
讀書槭槭葉聲晏

三君招予九日六和塔登高風雨不果仍
用前韻奉寄

昔誦登高文天隨感所見何如采黃花閉戶顏自
練選臺非騎危趨山若登善浮圖插江潁越絕識
真面攀緣夙有約旋若蟻九轉擬學岑杜輩慈恩
鬪詩硯零雨阻游屐想見青一片茫茫招海賈曷
月申藻薦枿拱麗新營層壁繪天眷當願年穀豐
風濤復清燕收穫如寇至忍使屏翳先坐念班掾
言抑塞不自遣溼歌待窗明愁吟炙香串遐覽分
既違湫隘甘侶晏

趙意林添構隱几山樓爲三層賦詩紀事
屬予次韻

經義注上宮明裡制重屋樓居自古然層構擇嘉

木乃有列仙儒思展千里目靜稽喻浩經一過不
再讀般倅恣麾斥重見四簷撲俯檻恣窺臨拔地
獻蛾緣有如駕飛鸞倒景互奔逐予生苦卑棲籬
壁常局束手撻大滌雲憶昔縱高躅十年墮塵土
掬水難浣俗丹梯上更上碧闌曲復曲飛翠落襟
前脩然謝五欲看山不下樓有酒願頗足何減南
湖主羣仙誇繪幅宋張功甫南湖園中有羣仙繪幅樓盡見江湖諸山危臺
休宜三名園樂非獨爲語阮家咸繼聲寫麗矚謂令

姪誠夫

東坡先生墨妙亭詩殘刻十七字石齋黃
公得之琢其背以受墨名曰斷碑硯今歸
桐溪汪氏拓其文裝於冊來索詩

吳興太守珠湖客繕亭蒐碑聚名蹟誰其詩者長

珍做宋版印
帽翁鉤勒溪藤上樂石後來烏臺有追勘蔡奴之
兄未攬撫衆碑零落一碑存又復缺斷真可惜誰
知此碑爲此硯世閒物化等兒劇漳浦黃公署名
在箕尾中天映奎壁文章氣節兩不虧汪子寶之
永無斃

題汪近人煎茶圖

巢林先生愛梅兼愛茶啜茶日日寫梅花要將胸
中清苦味吐作紙上冰霜極敲門走送古梅枝索
我煎茶圖子詩此圖乃是西唐山人所作之橫幅
窠石苔皴安矮屋石邊修竹不受厄合和茶烟上
空綠石兄竹弟玉川居山屐田衣野態疎素瓷傳
處四三客盡讓先生七椀餘先生一目盲似杜子
夏不事王侯恣瀟灑尙留一目著花梢鐵線圈成

春染惹春風過後發茶香放筆橫眠夢蜨牀南船
北馬喧如沸肯出城陰舊草堂

賦詩牌和嶰谷

誰將平水韻刻竹縱橫呈集韻以爲詩詩牌所由
成如彼伯玉妻盤中辨形聲其難各一字

韓詩六字常語

一字難

其數逾百名

儀禮百名以上書于策注名書文也今謂之字

區分忽

陣合星列俄雲行束縛窘意匠凌亂鬪心兵韓豪
不得逞李捷那可并諦視經營始落落疑殘枰脫
簡類酒誥補亡待由庚耐險劇登棧須滿呀填阮
得雋亦偶爾取鬧真無情頃之目光到手敏緣思
精棄取判碁玉虛實歸權衡音通柳𠄎讀意協猗
那賡澀體篠驂亞餘韻瘵絮爭泥塗弄明月枯枰
擢芝英君家詩神王筆掉橫海鯨勺涔出變化一

一敵皆勅分曹破往例遞送同踐更復製詩牌詩
用以堅齊盟我媿才力薄壁上觀崢嶸身世等格
五科第任投瓊惟此文字戲見獵心猶傾和詩傳
故事奚事鍾嶸評

西顥歸自津門過訪小飲草堂有作

薄薄江雲正護霜客來踏破徑苔荒劇談往事同
吹網小喚村醪可過牆俗眼舉肥愁有例歸心破
臘喜難當直沽冰雪三年住釀得詩豪百丈強

吹網

出林
間錄

十二月十七日夜坐

流光忽忽意騰騰顧影真如罷講僧行夜坊隅微
有月潑寒時節竟無冰向來朋舊空吟卷閑裏溪
山付瘦藤坐對梅花不成語十年孤負短檠燈

同麀徵西顥瑤圃放舟孤山探梅分得低
字

先春水波動碧潏明頗黎羣山盡倒影延緣葛嶺
西歲晏競錐刀甕天亂醯雞梅花冷笑人誰踏蒼
苔梯風遏船尾住日薄林影翳斜窺冰匳色漸上
寒梢低亭空撫陳迹事往多觸摠同來看花客半
作泉下泥我輩幸身強濁酒勿厭攜吟袖訝染香
醉墨爭題鷺嚴城自難越催歸鳥擇棲湖烟晚橫
黛回首境已迷

除夕南湖草堂作

除夕今番景色饒輕陰門巷漸微潮出籬水影梅
烟動隔屋春聲燭燄銷慈母行年開八秩太平生
世見三朝野夫不記身名賤料理杯盤菜甲挑

白樂

天詩行開第八秩自注時俗以七十以上爲開第八秩芥隱筆記禮八十曰有秩故以八十爲八秩

正月三日南湖大雪用東坡先生清虛堂

雪韻以下庚申

去冬晴暖草茁沙青蠅醜扇蜂放衙天公與物壓
疵癘預儲萬斛空中花除夕陰陰星斗晦粃盆樺
燭明千家元化迴旋謹歲始先驅風伯搖棲鴉奇
寒特地作清瑩一雪三日何紛葩樓臺高下若界
畫林薄雜糅誰梳爬老夫興發叫奇絕徑往古寺
尋僧茶繞湖躋躅看不足出郭底須勞馬撾一峯
竹外炯難寫籤排凍指徒興嗟不如歸擁地爐坐
內景一氣含朝霞

人日立春用壬寅年人日雪韻

佳節翩翩故作妍新詞祝向酒尊邊釵頭人勝兼

春勝鏡裏今年健去年大有城南刺船興行爲江
上看花顛苔痕尙積牆陰雪且殢重衾一醉眠

同麀徵敦復西顥曦亮北亭游西溪進舟
西堰橋望秦亭法華諸山晴雪

素色望不窮連峯出橫約懿此春霽初尙果汎雪
諾寒光到天淨日影穿林薄巒過首屢回灘淺舟
時閣憶昔探疎梅未逢飛霏落及茲剡中興凍損
萬千萼去年奇溫梅花盡放
今春爲冰雪所萎勝事詎易兼清游聊
可託下春對玉屏相暖有芳酌

暮至西溪寫望

緣源遂輟櫂地冷人事幽翳竹見雪屋隔溪倚漁
舟行歌互相答平衍開閑疇林壑遠繚白貫以青
瑤流落日照東塢悄然思舊游童稚今始衰鬢茅

不自謀有媿扶犁子將事叱春牛

夜宿溪上巢翫月

臥具寄閑房溪響無時空童子香自焚幽夕起禪
諷門開微月色潺湲正堪弄月午山風來蕭蕭松
影動鳥棲澗戶春雪護峯腰凍此時共林僧忘言
亦無夢

曉入石人塢至粟山下看泉

初日照深竹微霜溼如煦東山氣稍和崑崙此迴

阻石人不可卽石杵杳何許

太平寰宇記錢唐粟山下有吳大帝石杵

題刻尚存

惟有空林泉鏘鳴自終古飛蘿濺輕烟灣碕

漂翠雨泓泓惜遠寫激激復新吐能令耳目清相
與爲賓主

游張氏溪莊是鄒孝直河渚草堂舊址

蕭散悅事外鼓枻轉回源偶沿松下援遂叩花裏
門萬花盡萎香落粉空苔痕今晨山雪霽疎闌坐
微暄藤格穿窈窕莎徑銷塵煩水流過北牖岫列
開南軒昔人隱蒙龍寂寞道自尊時預緇素會偶
隨樵牧言惓然撫遺躅吹樓匪思存

晚過秋雪菴

斜景雪峯青容與來沚中春田渺無際碧流漫交
通擁楫忽生寒峭風吹自東鱗雲漾天影落日明
復陰鐘梵此時歇空香出浦深香門渡橋入魚鳥
皆相識更上小樓看澄心延暝色欲留苦不得輕
波送客還村圍何限樹溪口轉多灣晚契真如理
期水又期山

信宿溪上巢夜復大雪曉望有作

清寒山夢驚曉色上佛幌披衣俯高牖的皪帶林
莽亂迷荒塗蹤深罨春流響稍稍雜雰靄冥冥失
諸嶂昨來渚上游復此正中賞餅盃有妍淨松竹
同偃仰寧寥觀太空眩花本無象一庭虛白光湛
寂生妙想

雪中西溪歸舟

興盡歸亦好野艇僅容膝推篷山趣多肆目愁易
失雲雪相模糊粉墨一蕭瑟橋危積未平簟深飄
更密中閒五六人把酒兼散帙范寬與趙幹正復
難下筆

題張情田種瓜圖

北垞南鄰路未賒荷鋤深隱不須誇鶴飛猶認孫
鍾里飯罷同尋步隲家十畝青山新戶口一牀斑

管小生涯畫圖只有長安許解寫縱橫五色瓜

圖爲

許江
門筆

紅橋春游曲祝荔亭席上西唐授衣同作
客愁當春亂如絲挂在紅橋新柳枝主人官小肯
愛客載酒喚船波拍拍孟婆跋扈作餘寒玉簫吹
過曲闌干東陵飛下三青鳥女兒破顏鈿窩小繁
華瞥眼徒紛紛牛羊踏穿阿麼墳隔江山映殘梅
晚招之不來殊偃蹇主人勸客爲樂方陳郎叩舷
發老狂高子哦詩妙五字游魚出聽燈在水風花
上已連清明有約更賦麗人行

杭堇浦編修以詩寄越香次韻奉謝

雲窗風味極深嚴遠致餘熏妙語兼詹事可容評
甲煎魯公未許續香簌春宵几閣勞相憶微雨房

隴好細添因有辟寒燕玉在溫磨肯爲故人拈

以越香寄樊榭徵君

仁和

杭世駿

大宗

南湖雪月劇清嚴特寄名香百和兼拂去定應
縈玉枕屑殘猶得壓金簪重衾隔雨微微潤小
榭因風續續添知有閑情工繾綣茗娘纖手喜
初拈

君侍姬
茗人

四月十九日藥山招同敬身西林集湖舫
分得人字

平湖清霽碧無塵來作遨頭也快人試挈櫻桃蠻
榼小更烹槐火石泉新鬢絲似我追今昔山色如
君忘主賓尙惜三潭涼月好不教迴櫂采香萼

韓晉公五牛圖

藥山攜示
書畫二種

一牛胡襍襜陰虹屬其頭隨意齧枯棘轉噍不肯

休一牛徐步得自由彎彎雙角二尺修考工有語
牛戴牛一牛植立不見尾黃鍾滿脰鳴聲牟一牛
日高隴上晝耕罷回顧擔舂吐舌欲飲陂塘流惟
有一牛施穿絡得非王鞅兼裴韜觸牆那解成八
字奔馳不息知何求有唐韓晉公名蹟今傳留集
賢官畫偶失收濟南別駕跋尾適晉公功業在節
鎮轉輸萬斛江淮舟爾時助國遏狂寇首重力穡
乃有秋烏犍白牯禁出境圖此無異聽田謳廣桑
山中悟夙世臣節終守繪事優幕客戴嵩早入室
遺筆不見令人愁君今百里攜示我故物知出宋
商工竹垞詩妙珊瑚鉤我欲躡步非匹儔但當學
取滎陽褚氏相牛法烟蓑雨笠追逐碌磚村中游

賈秋壑玉沈蘭亭

元相胡椒八百斛賈相蘭亭八百匣權倖雖同嗜
好殊簿錄當時有常法褚書縮本三摩挲名以玉
枕珍無過援兵不救呂文煥武爵翻酬王用和猶
傳石刻風流在蟋蟀堂空長秋菜眼見神龍第一
箇與此滄桑閱人代

宋理宗下嫁周漢國公主于楊鎮以神龍蘭亭爲第一奩

見袁桷清容居士集

移居四首

南湖結隱八年餘又向東城賦卜居頗愛平橋通
小市也多喬木暎清渠杜陵突兀見此屋韓子辛
勤始有廬笑我天慵俱未遂不妨隨地狎耕漁
華髮蕭蕭漸滿顛可無清境著閑仙安排桑苧新
茶閣位置樵青贗釣船細雨連畦容緩步涼風動
樹足幽眠麋公祠宇今相並且逐鄰翁掠社錢

里

古社祀蜀漢
麋公子仲

莎徑梅坪密復斜百弓堪作小園誇
繞牆細數遲生筍縛架親扶已臥花
叢雜琴樽臨頓宅清貧眷屬伏川家
從人畫出村夫子舊事它時一笑譁
封軺前日斷知聞月渚烟林合策勳
仰屋著書聊耳耳閉門種菜漫云云
驗時巢燕方新乳迎客昏鴉欲作羣
稍待芟除荒穢了一軒風景任支分

爛溪舟中爲吳南礪題賞雨茅屋圖

賞雨古今無表聖乃其獨詩品二十四
此語最娛目瀟瀟感舊襟點點量愁斛
人言長安道不及王官谷君家吳山陽
亦有香茅屋清聲觸巖阿幽籟破林竹
起攜玉壺春引滿看簷瀑遠笑自雨亭
天械已潛伏束書走淮海圖經事攢錄
故交施田與

張

南漪

歸夢對牀卜一簾清淨水佳趣難頓復何如

雨美膳安居果吾腹

華嚴經云護世

美膳閻浮提雨清淨水

我初

營新巢牽船過堰速逮此冥濛天溪上梅子熟行
與君周旋學舍苦偈蹠展圖生懽悅篷背聽撒菽
雲波尙蒼茫且就鷗邊宿

甲寅秋杪有過平望懷王載揚詩丙辰同
被徵相見於都下今年夏五重會於邗城
僧舍載揚用前韻見贈再次奉答

幾年分手輟塵紅重見江城檣釣篷賀老清狂尙
吳語杜郎雅麗是唐風朱門冷炙三生夢禪榻茶
烟一禿翁爲話舊游姚與鮑

玉裁文學西岡明府

王湖遠隔

水雲中

原作

吳江

王

藻

載揚

幽蘭初吐夕陽紅喜值吟仙駐短篷京洛飛塵
同昔夢江湖聽雨見清風一聲鐵笛東維子幾
闋香詞白石翁更誦移居新製好幾時傾倒草
堂中

秋江行

秋陰如墨渲尙輕秋江如練熨始平秋風遭之鱗
甲生隔水婉婉秋山橫秋蛾凝碧怨已盈秋帆一
片破空去下有秋士與目成日向天涯飽塵土何
如賞此崢泓蕭瑟之秋情君不見秋江行

七月十七日病起小園作

是日白露
田家忌雨

青林曲渚迴塘臥起西風竹牀小雨不妨白露高
雲忽轉殘陽銷除肺病無暑暱就心情已涼正有
餘閑弄墨籬葵浥浥新黃

白秋海棠

瓊姿不著一分肥如此幽閑絕世稀
當戶金星開曉靨下堦涼月曳秋衣
望來甘后風神似愁到班姬笑語非
只有流螢信孤潔夜深常傍短叢飛

偶出

偶出天陰淡城隅地靜便涼雲竹枝外秋水槿花邊
陡覺衣棱薄回看笠影偏無人見行跡幽意若爲傳

秋爽

古堞連秋爽迢迢入遠空年光伏枕後人事杜門中
桂氣熏殘日梧聲墜晚風同時榮落意吾欲問天公

南鄰桑屯田弢甫見訪兼和移居詩輒賦

五言用酬雅貺

窮居蔽泥水車跡過從稀避俗翁今是棲仁里可

歸

沈約郊居賦僑棲仁於東里

牆低聞雒誦門靜接深衣自此

陶嘉月聯吟願莫違

曉望

徙倚東臯上微寒欲衣

去聲

縣遙山著秋瘦小沼得

風連半落鳴機月連晴曬穀天病身仍健在一飽

頌豐年

西林招看菊小飲分得開字

子有東田屋西風幾度來看雲穿徑遠緣水到城
迴紫蟹依方釣黃花爲客開醉醒無不可肯學俗

喧秋

沙河蟹以釣獲之

九月十三夜月

夜靜樓陰直蕭寥犬吠闌江聲喧歲稔霜信壓秋
殘桃葉經教誦巴童藥遣丸無眠五更轉隙月近

人寒

杭俗以潮大
爲有年之兆

冬日同友人集倬雲禪師方丈

故林初起疾謝寺復相逢落葉徧深院寒雲過斷
鐘淨蔬充一食鄉思在諸峯別去經龕閉安禪禦
凜冬

同西林游水陸寺追和東坡先生韻

笑指東坡宿處村卅年重打老僧門詩中修竹還
依舊劫外疎花又返魂龍攫何年香殿壞烏啼向
夕石幢昏歲殘真有幽居味喜得龐居士共論

鄭筠谷招飲書帶草堂同張南漪作

焚魚卻賦遂初衣卜築東臯願不違湖上青山如

有約京華白髮幾人歸舉杯中散情偏洽撫足梅
公歎亦非時以足疾得告猶有舊時耕釣伴遲君西崦筍
牙肥

集小山堂食熊掌作呈谷林

熊肥壓蛙瘦長吉語難兩高齋集吟朋云此自遠
餉駢指含淺臙舐痕隱其上廚娘縷切餘無復攫
拏狀平生所忌者持付食肴將筆以筍菌甜調之
用重釀馨逸魁羹材箸起未肯放遐思深山中是
物最神王傾崕恣咆嗥豐草供跌踢拗樹有餘怒
擘人定非妄導氣通仙經善蟄隱寒嶂屈伸義或
備肘腋疎周防是何雞狗輩碌碌齊得喪雄姿墮
鼎鬲罷食爲惆悵

新正五日將赴西林臯亭探梅之約晚晴

志喜

以下
辛酉

已見雪爲雨天教五日晴閑惟覓禪伴老更勇山
程晚色鈎簾淨春泥曳履輕花風吹第一明發摘
船行

沈家塘舟中望臯亭作

飽聞臯亭幽梅花若香海彌年扁舟意故人肯相
待況多古來迹出郭興已倍密竹沈崧家長川伯
顏壘蕭散且同羣興亡渺千載紛吾愁靄霽旭影
一峯在頃之風褰霽好事煩真宰鳥下翠微明林
開宿雲改去作詠花人庶無後時悔

繇金家堰入臯亭西麓至崇先寺寺爲宋
顯仁韋太后功德院

石路風輕逗嫩寒繁花遠近幾千攢花明正要微

陰襯路轉多從隔竹看春似合江堪載酒竭來古
寺記迎鑾誰知當日龍沙恨不見吹香到地殘

太

北歸曹勣作
迎鑾七賦

過橫山飯伏虎禪院

御栗橫拖去登臨不用扶寒香接天影嵐色上花
鬚饌淨僧分供庭空客與娛平生到難處結習付
圓蒲

入桃花塢至山半觀龍潭中有蜥蜴數頭
咸淳臨安志所云水甕也

盍裏何年咒蜿蜒入廚剖竹走涓涓癡兒不識神
龍宅只道山中一斗泉

中塔院禮真歇禪師塔

靜院無人迹看碑拜蜀僧過牆禽動竹開戶鼠翻

藤寂滅超諸相安閑得上乘依然蕉葉塔誰更續
心燈

訪桐塢安廬爲明慧文法師隱處

不見臯亭慧法師

李先輩
長蘅句

孤峯幽澗若相期前身

明月今應是修到梅花定幾時半百已知逢世拙
十年真悔入山遲試參金粟堂中影待我重來照
鬢絲

暮投徧福寺宿楚木禪師方丈

西峯日落東峯昏游人迤邐沿山村烟中問路得
樵叟青蘿一徑穿頽垣怪禽啼處明佛火新月照
地如無痕跳岑左右出林表參旗井鉞歷可捫千
年廢殿作蔬圃把茅蓋頂三間存龐眉長老我舊
識道韻簡淡顏清溫草屨峭緊久不用舌挂屋壁

空無言繩牀留客意頗厚泉淪性海通真源睡蛇
此夕自遠去前塵何足勞夢魂千花玉雪亦可念
坐待窗紙烘朝暾

人日泛舟至龍居灣遵山徑入永慶禪院
用韋蘇州藍嶺精舍韻

船子俟前灣路緣松色上複嶺始成誤偶遂登高
賞一公昔經營流水如在掌

院爲明一濂上人所創

層層蒼

翠中梵宇開虛敞前人舊游處我輩自來往門閑
花氣深山空禽語響遣俗暫徘徊懷賢成俯仰

李長

蘭有宿永慶步月詩

同鄭筠谷河渚看梅宿鄭雪崖北渚草堂

迢迢小籃輦直至木橋旁晴雪一溪影白雲千嶂
香偶逢谷口隱如過藍田莊沿月櫂歌去梅花夢

不忘

同筠谷太虛上人游花塢諸精舍十首

精進林

數坐是何處蒼雪圍青霞禪心如定水中滿七淨
華

法楞菴

當年避雨至白氎寫經寮門外翠陰合泉聲飛出
橋

六齋

幽篁不見天月出影穿漏照見齋榜題三點無新
舊

在澗菴

在澗復在阿香閣橫空起澗水落天光時明疎竹

底

憩錫菴

泠泠金策聲挂在春浮樹應被樹神留不復更飛去

眠雲室

風磴折而上雲深年復年佛屋春寒峭覆以兜羅絛

樹雪林

澗東清磬發隨風過澗西離離覆澗梅已落開未齊

谿飲菴

斲苔傍溪居春來泉脈動喧寂兩俱忘風瓢聊可用

雲巢

經臺烟籜翻定石風枝掃一片綠天中消搖除熱
惱

實相菴

結茅在峯心杉竹蔽如舫茶烟去復還復颺孤藤
上

小圃手植紅梅始花賞以長句

青羊宮路絳霄春入骨陽和信息真只合移根從
小市不知何處有雙身二句皆紅梅事砂丸竹外紛誰擲
丹的風前染乍勻一點微酸如可托不辭花下酒
杯巡

筠谷見和移居詩有聽雨並宜東郭住看
雲各就北窗眠之句筠谷新宅亦在東城

再用前韻奉贈四首

燕鴻蹤跡十霜餘誰道今來慰索居
蒸朮烟深雖隔巷澆蔬水遠亦同渠
囂塵以外偏離市廉讓之間穩結廬
何事報章頻往返不過文史當佃漁
置身曾在閩風顛得請人稱是散仙
拓地醉鄉新立戶掀天宦海早回船
忘機鷗似添佳侶無事雞難喚熟眠
聞道高樓收遠翠幾曾輕費見山錢
縈紆古堞路橫斜邛竹輕扶健可誇
舊日掌痕驚夢草老來腳疾愛尋花
食單不用門生議步屨常過野老家
每坐草堂談娓娓隔籬人在寂無譁
蠻觸紛爭百不聞陶泓日日共餘勳
玉堂故事歸田錄委巷叢談灌圃云
慧業君參無上法衰顏我避少年羣
敢言二老成來往聽雨聽風或可分

杏花下感春作

新暖殘寒薄綺櫳花枝刺眼寂寥中初來燕子窺
妝面不動參星照小紅已倩含桃作房老何須芍
藥號崖公只消春雨江南意手把霜絲對晚風

題芮衣亭觀察望雲圖

芮公秉淵粹吏治飾儒雅理劇無全牛撫循去害
馬自從迂上官未得歸白社辨銅如令丞奔走靡
九夏海濱兩黃髮久缺獻春輦安輿迎莫致悃脰
意聊寫望雲與叱馭知無二心也

鄰牆杏花和桑弢甫

韓公謫江陵見花憶京輦我從學圃餘種杏遮老
眼一枝頗橫出風味極嬌軟卻窺鄰翁牆暈臉本
同產匹如大小喬東風嫁各遣脈脈抱單愁盈盈

欠雙撚故人過題句語妙不容選豪家玉闌空苔
沒爭春樞美物詎同歸妄心聊爲翦小立斜陽裏
詩成一笑筦

來詩有豪家玉闌空
過眼成小劫之句

二月十三日雨中書事

僻巷無人到荒溝繞舍分雨多春半過鼃怒夜深
聞徑草全侵屐林花亂入雲誰云作詩苦終愧織
簾勤

湖上效嬉春體次南礪韻二首

經時未識西湖面況復勝侶招春遊行雲不礙梅
花嶼新水初生闌葉舟玉局風流那可見鐵崖故
事誰當修山眉波眼故常在過卻嬉春也逗留

梅花嶼張望湖副使
別業也今酒樓仍其名

今年好春半風雨綠勻紅溼動湖光聽歌緩緩懷

遺俗屢舞傲傲恕老狂兩高峯頭人上冢三天竺
國女焚香更話前朝夜游樂花上燭龍波底翔

同家人輩奉老母小飲桃花下作

園林雲霽曉風高扶掖童孫不覺勞百葉花宜娛
白髮三升酒易典青袍上書久謝東方朔結網深
憐北郭騷惟願年年小寒食綺霞圍醉坐週遭

杭郡庠掘地得蘇文忠公表忠觀碑宋刻
二片

唐政不綱四海淆朱三作賊過於巢鬪雞牧馬盡
黃屋羣雄並起爭咆哮錢王兩浙爲保障職貢世
守橘柚包百年運去識真主自攜圖籍歸汴郊歐
九思公幕下客何事作史相譏嘲竊觀私誌簸錢
謗酬以尺喙非叟叟表忠賴有坡公筆文如月表

楚漢交大書突兀扶屋極餘力入石蟠生蛟誰知
楊璉築白塔塔材蒐索填深坳淮南張氏又折毀
新城摩雲防寇鈔是時四石僅存二有人寶惜埋
東膠靈芝荒苑轟祠宇伐山置棟豁且庠墨本重
摹失適勁匹如蹇足追蒲梢今碑爲明嘉靖中
太守陳柯重刻忽
驚故物仍出土園丁奔告鴉觜拋學官弟子共太
息苔痕橫臥鄰齋庖千金已免柱下辱野火幸無
牧豎敲報功復古有位責移貯祠廡蹇長笏豈第
君子神所勞春秋享祀和弦匏

三月五日小園偶成

三月五日新雨晴愛向閑園樹底行不知春水夜
來長但見落花風外輕紫筍參差看作竹青梅磊
落欲攙櫻道人坐閱韶光老嬾與塵中歲序爭

題東坡先生雪浪石盆銘拓本卽用雪浪

石詩韻

中山奇石猶雲屯蘇公筆陣書林尊回環屬讀有
奇趣如月照壁難霾昏當年礮材久摧落雨淋日
炙眠沙村偶然寓意在鄉土便如雪浪爭夔門九
華明窗未能買一顰眉綠偕銷魂人間貪著盡幻
妄要須禪喜窮荻根不見宣和築艮岳峯巒萬態
金填痕汴圍日急取作礮世事變化安可論靖康
圍城
時取艮岳諸石爲礮
見三朝北盟會編摩挲已似銅狄話拄杖誰窺
玉女盆如公偉人不可見只有文字千年存

嶰谷以曲竹杖見贈

九節仙人杖鏗然脫贈奇曲能存直體瑩可刻新
詩添得閑家具留爲老護持塵中不肯用台宕有

前期

夏日臥疾誠夫惠杏酪一器作此謝之
鵝王乳色白勝酥仙杏爲漿雅稱無寒食和錫傳
故事鼎娥候火費工夫口香三日驚猶在肺氣兼
旬覺頓蘇珍重攜來情不淺食經端爲起詩癰

六月十五夜納涼作

停待江城暑氣清鐘疎漏斷欲三更月明不見星
河影夢醒微聞梧竹聲爽處身疑作寒玉慵來心
未憶秋檠空簾小院無人到起看盆荷帶露傾

立秋日苦熱

閑居節序任推遷無奈炎敲尙有權鬢畔一年秋
又到望中六月雨空傳呼雩故事煩官長病渴心
情夢石泉幸甚發狂非束帶桐陰赤腳故蕭然

以香櫟送西林系以長句

不羨龍涎出嶠南
香林作狀補嵇含
橘官淺俗難同調
桂子芳辛許共參
絡斗帳中醒夕夢
供橫幅畔對朝嵐
西風入手微黃處
寫寄新詩海岳菴

送奕聞計偕北上兼簡令兄堇浦

北風吹雁度黃河
南客偏教席帽馱
都講才名吾久識
文場秀句子偏多
聽雞曉榜開蕢燭
走馬春關試杏羅
棣萼故人如問我
正園近日自成科

歲暮二詠

典衣

青鏡流年始覺衰
今年避債更無臺
可知子敬家中物
新付長生庫裏來
半爲閨人償藥券
時朱姬病甚危
不愁老子乏詩材
敝裘無恙還留在
好待春溫臘

底回

借書

歲闌百事不挂眼惟有借書聊自怡燈炮風宵親

勘處篝香霜曉手抄時里中今得小萬卷

東都事略朱昂

篤學人目爲小萬卷謂趙子誠夫

貧甚我慚無一瓴舊史臨潢新

注就不知誰肯比松之

時注遼史成

沈椒園侍御寄和移居詩用韻奉答四首

當年挹袂早春餘曾訪臯園水竹居竚聽歸鴻過

別館閑隨芳草繞通渠贈予朱老枕中祕卻返白

牛涇上廬

癸丑春晤椒園于杭以朱性父珊瑚木難爲貺

從此浮蹤忽南

北恭聞尺一起樵漁

長安秋述欲華顛回首羣公盡列仙八月星河虛

賣卜三山風浪枉乘船修門又是攜書別東郭堪

容抱甕眠自向鉏瓜問消息不須籬落望飛錢

傳來佳句字敲斜詩室東陽儘意誇藥樹班行依
曉日茶廳滋味汎輕花幾人動色觀封事四韻寒

香壓作家應是本師查長老令巖壁壘寂無譁

謂初

白先生

書題遼瀾念相聞隔歲方酬子墨勳臥上下牀豪

氣在佳東西屋古人云

謂令兄房仲

梅花溪月縈清夢

白鷺汀舟有故羣直待許身公事畢數椽漁舍與

君分

君有卜居西溪之意

樊榭山房續集卷一

